

春帆集

歲癸亥

滇西師

範荔



元日試筆古近體詩六章

惟物必有初惟歲必有始夏時之所行人乃天地紀特筆
表春王千秋傳信史一十二萬年元會究何止今年又元
日亥亥干則癸呼之不欲聞書之亦可喜渺然宇宙寬生
氣被蒙汜曉起酌屠蘇盈盈半江水

六千里外遠回首春光遍綠沿河柳梅花山茶與玉蘭一
時齊發爭侑酒鄉鄰揖讓見古樸門巷謹譁雜童叟殼楨

柳帶雲蘆傳餌絲
資食匪不有官鹽
已去年穀登親戚相
親笑盈口

五十三元旦連檣泊漢江
聞知今歲早春喜
一年雙拜跪
聲喧岸衣冠色映窓
何當見君子頓使我心降

唱罷天雞問早朝
鳳皇城迥路迢迢
宮雲暖逐和風轉樓
雪晴隨瑞日消
人在江湖空佩芷
春生庭院遠銘椒
濛濛烟雨襄陽郭
坐對辛盤倚畫橈

元乃善之長且為天所宗
徒然增一歲歲歲總相逢

難求雞日景融怡令節
今年倍繫思敢道一官如傳舍關

心水旱大雷池

雪中隸事戲成短句

竟與氈同咽稜稜鐵作肝
知還有胡婦擁背度宵寒

蘇武

不為干人出三公局已存
一舟江上泊壓被坐黃昏

袁安

詠絮才原妙空中亦撒鹽
鹽寧輸絮白女覺比男尖

謝道韞

霰集風如剪蒼茫一掉來
何須見安道好趁曉光回

王子猷

開簾常把卷繼晷不焚膏
到眼無疑義清光夜夜叨

孫康

林岫已皓然郊邑正飄瞥
莫笑道人迂吐詞欲飛雪

道壹

木落遠阜空水澹寒流耿
衡門亦悄然俗駕何由騁

黃徵君

人隙而冒棟成圭復成壁齒牙有餘清幾奪蘭臺席謝惠連

四語曲傳神滕六聞之喜空色色空心吾今達斯旨羊孚

林表與城中究何知許事即茲已入選終覺近遊戲祖詠

慘淡藍關路公心對欲酸潮州無雪到回首望長安韓退之

寂寂夜將半銜枚千騎趨寒光森鐵甲瑞色映金符李愬

陶家好風味苦被侍兒嗤于我偏無礙呼茶自索詩陶穀

歌伎與廚傳遙從伊水來龍門佳興在此誼已悠哉錢思公

偶足滕籐韻難為木桶人雲寒溪水濶清絕苦吟身呂微之

壯歲謫黃州江山相與媚清姿正滿堂值得先生醉蘇子瞻

心齋如坐忘妙向此中領寒入廣除深亭亭兩清影游揚子

淡抹與輕彈寒輝發毫素迢迢日觀峯時有瓊瑤護黃鶴山樵

初八夜見月

天際半輪月今年初次看知猶存臘意殊不耐春寒江近

波同碧人閒夜易闌從茲應漸滿破鏡許重完

初九夜見月

浮雲銷已盡天忽放清輝人自異鄉瘦月從今夜肥江城

高屹屹林雪遠微微顧影遙相問何時照我歸

元宵對月

春帆集
燈火光相映山河影不寒憐他終歲月初向此宵團虛幌
時同倚春舟獨自看照人清可掬無事怯衣單

十六夜對月

又向江頭望今宵覺更圓遠從滄海出高帶楚雲懸文選
樓東路傳柑節後天沿隄小兒女拍手樂新年

吳杭

吳杭轉運楚江濱卧對滄波過五旬幾隊隊看鷺戲水一
船船載女遊春無能爲役貧如故豈不懷歸歲又新歌罷
北山閒采杞天涯原有向隅人

畢役

畢役春江雪未銷襄樊樓閣鬱岩巖空山日冷豺狼伏高
廩人稀鼠雀驕剗肉補瘡成底事刻舟求劍更無聊武昌
城畔來仍往已有東風颺柳條

病起後訪秋士明府賦贈一律卽以誌別

臥病江干泊久停皖城催運等流星蹒跚態向天涯老呼
應聲憑地主靈采藥難隨居士去吟詩恐被浩然聽梅花
香裏容相接滿座春風擁畫屏

古隆中謁武侯祠敬成十六韻效壁間石刻體

此地傳龍卧霜清古木稠我來嗟已晚道在向誰謀炎祚
灰同冷茅廬跡可求躬耕田一片抱膝石千秋出處惟

公正孫曹盡國讎策寧紆割據事本費綢繆局自三分定
心於二表留江山殊落落庭戶日悠悠憶昔吟梁父曾聞
論益州圖窮荆蜀險陣納烏蛇遊字有崔龐對才非管樂
倚天難摧壯志人易忽純修負鼎伊烹夏回車尚造周深
憐高密弱微覺子房柔玉韞巖增采珠藏澤被休成都桑
八百無計老菟裘

病起謁九宮山遂之古隆中

九宮山前石峯巒扶登屢跼病夫脚郡人爭喚小武當紛
紛男婦奔驛絡元冥之宅天所司惟脩與熙或茲託水無
失職德在坎太子何必真淨樂漢江西去波滔滔峴首南
橫雲漠漠停輿竚立春風吹悲哉古人不可作舊遊回首
十五年記有清娛共旁薄往事都成雪上鴻求仙誰誇樓
頭鶴匆遽未讀摩崖碑爲慕隆中好邱壑抱膝如聞梁父
吟披帷百拜完宿諾

歸路經萬山解佩渚沉碑潭俱在其下

老龍堤接萬山根新雪爭飛舊雪存解佩渚邊雲自合沉

碑潭畔水長渾千年陵谷原無恙
一夕周旋便是恩三月襄陽城外泊
遺蹤落落向誰論

漢江返掉

返掉真從此吾今喜可知短篷三月病
長技一囊詩輸轉非無益誅求若有辭
惟公試斟酌粒粒總瘡痍

過多寶灣

灣忽傳多寶洲曾過密金湯湯江漢水
滾滾利名心予自懷高尚天難斬苦吟
所思在何處纖月映遙岑

舟行四詠

又是一年人離愁草共新洲橫清漢曉
路入皖江春寒雨

催全綠東風染漸勻黯然南浦上天遠
水鱗鱗春草

南北家無定逢春便是歸不愁繪斂密
羞為稻梁肥長路

隨風舉晴天結陣飛故山生計好毛羽
未全稀歸鴻

春江二月流春野日悠悠鳥宿新晴樹
人誼古渡舟誰肯

停篙待真疑打槳遊橋成在何日風浪
免生愁野渡

一水盈盈隔層樓兩岸齊漁歸門曬網
浣罷埭鳴雞肆半

居豪估人知唱大堤炊烟青不斷燈火
照猶迷江村

戲詠仙桃鎮

雨歇春江二月天多情空自結纏綿武陵源裏曾回掉縱
有桃花不是仙

漲落長堤露淺沙風吹紅雨入雲斜劉郎莫更思前度滾
滾隨波水一涯

舟中坐雨

竟日舟中坐廉纖打箬篷聲聲寒到水點點細迎風別具
催詩意兼成潤物功江波看漸長消息杏花通

欲雨天先濕當春地已蘇如膏能布澤着草亦成珠江隔
陽臺遠雲連楚塞鋪關心漢南柳眉眼尚模糊

泊舟仙桃鎮鐵禪以本事詩出示淒艷可感因環次
之亦道鄙意也

樵風吹上富春江坐擁嬌嬌倚畫艫紅雨園亭團戲蜨碧
雲村塢臥靈龍簫橫夜靜歌容反酒仗拳高醉不降倦卽
憑肩愁拍手妒他沙鳥自成雙

秋到三關雁亦雙錦裘不爲朔風降揉雲午溜盤釵鳳踏
雪宵迎守戶龍當暑未經裁越葛按圖時與証吳艫白頭
無復邊城想暮雨瀟瀟卧楚江

愁腸繞地曲同江往事茫茫月過艫珠勒影銷歸院馬金

鈴聲斷吠花龍沾泥絮不因風起卧鉢龍因呪水降清却
六根心似石開緘空對鯉魚雙

藍田曾種玉三雙碁壘詩城取次降龕上經能安怖鴿雲
間書許致仙龍心如岱岳孤生竹身是中流不繫艤桃葉
當年原有渡悔教烟浪阻長江

武昌吟寄懷萬海莊通守張小岑明府

武昌柳不可折武昌魚不可食試問城中居何如城外客
都是腰銀佩印人異地棲遲况衰疾與衣索米無日無垂
老蒼黃計家室萬海莊張小岑楚山嵯峨楚水深攬茲紛
繁雄麗之勝概發我磊落抑塞之長吟憤莫擊禰衡鼓悲
莫廢伯牙琴乾坤落落爾許大眼前豈必非知音

既成武昌吟後仍作七古一章寄懷兩家少君

前年謁選經漢口淡烟才綠武昌柳停舟兩謁鄉先生匆
匆坐晤出門走去年運米江南來相逢倍覺相徘徊未得
纏綿話情素軍符火急晨夕催百艘遠溯襄陽郭夔蛇
各安所託卧對寒波懷舊遊北風吹雪每作惡張家驥子
能趨羣伯方謀仕仲工文竹山怒馬章江掉一樣思親望
白雲侗儻萬家好兄弟兄兮出遊弟兮侍他鄉八十老人

心養體猶宜先養志我今已打回帆鼓仙桃鎮西仍阻雨
會須同上黃鶴樓兩家昆季互爾汝胸中奇句容一吐爲
補當年謫仙語梅花開過桃花開又向花間賦南浦人生
寧學鹿豕聚

舟過鹿門山未得上

卓矣孟夫子飄然龐德公流芳千載後養晦此山中春水
浮天白斜陽着岸紅未能扶杖訪雙槩趁西風

舟中始聞春雷

遂與舟相習經秋又過春何殊五湖長忘是宰官身花柳

懷前路江山各要津震雷凌夜發啟蟄屆斯辰

由仙桃鎮放溜一夜遂抵武昌作平仄二詩

水綠不可唾草綠若可褰浪急櫓反靜岸轉雪乍白鬱彼
兩岸柳趁此半夜月我自坐秉燭意與尚史適

時闕一溜尚史

四百里直到漢口泊舊迹忽過眼已是隔歲客

長江橫奔濤排雲聲湯湯和風從東吹樓臺含清光枯稊
回春姿紅輪升扶桑悲哉青狐裘蒙茸終何傷來時桐花
秋歸時桃花香勤勞非吾功無由甦痍瘡

江帆

江路屈旋螺蒲帆宛轉過雪殘融岸濕風細入窻多未辨
高唐觀難爲孺子歌楚天雲雨幻奈此積陰何

漢口

山作龜蛇勢崢嶸隔一江禹功畱大別周雅列南邦灘急
船如馬人多語易噓誼聞合劇臨水鬪新腔

回舟

二千里外遠回舟來是春深去是秋雁爲思鄉皆北向水
知朝海盡東流名場碌碌雞餘肋除日紛紛鶴轉眸坐對
晴波成獨笑半年天遣續清遊

葉家洲阻風送李君歸長沙兼寄蕃臯達夫篋圃

葉家洲前兩日泊東風吹船船格格遠天如霧波如鷺鋪
作江頭一片白仙湖李子安慶來游倦欲返湘南宅昂藏
身係中丞孫清門零落本堪惜明德之後有達者衣冠入
世慎所擇達夫篋圃吾故交廿載桑梓稱莫逆去年試吏
星沙城應官聽鼓朝繼夕長材雅度余蕃臯將軍座上有
揖客梅山朗水治謔存鄂渚聯吟訴心迹三君都是磊落
人相逢定可相扶掖到值湖邊花正開春草茫茫界天碧
爲言荔扉病且貧皓首扁舟尚行役作詩不改舊時癖

舟中口占

黃州蘄州等閒過楊樹柳樹相對青烟浪一江雲漠漠石
鐘山下睡初醒

春水船頭天在水一帆高挂欲凌虛迂儒已了公家事賦
罷新詩便讀書

江行雜詠

燈火蘭溪渡糧船夾岸排春分看已到何日過長淮
山勢連吳楚烟光禱雨雲青青一片草畱意染湘裙
歲儉欣逢麥春遲未放花炊烟當午少汲道入江斜

江濶豚吹浪天寒鵲選枝北風搖古柳斜日墮荒陂
巴蜀雪初消魚龍氣不驕田家鎮前水一夜下金焦
一掉郢中歸山山擁翠微匡廬如許上先爲掃烟霏

重上琵琶亭題壁

依舊孤亭倚碧沙江頭無處問琵琶兩三行柳未成絮七
八樹梅方着花送客人爭憐白傅按歌吾欲拍紅牙去年
九月西風裏手摘芙蓉水一涯

唐 蝸寄李仙蟠 權使觀察猶餘舊典型當時唱和有誰聽江浮屈戌

終年白山壓闌干一面青名士風流悲逝水詩人蹤跡感

勞星未能騎馬匡廬去笑挽閒僧指翠屏

舟過彭澤感賦

彭澤城中日正黃滿船雲影漾天光到門已綠先生柳抱
郭新栽處士桑九派江緣朝海合一官人尚折腰忙故山
剩有閒松菊未必田園便就荒

重登小孤山

來作中流柱鴻荒直到今江湖自空濶天地此登臨風引
千帆聚烟消衆木森舊題詩尚在知不負初心

記向金焦過蒼茫接海門雙撐原得勢孤立易成尊微徑
穿雲罅層樓踞石根隔江陶靖節可有菊籬存

馬當見雁

往來都與爾相偕秋月春風處處皆歸到塞垣無幾日隨
陽又復過江淮

南岸叢山似列牙張齧錯齧齧虛沙抱珠龍卧迴瀾裏歆
作船前五尺花

歸雁聲中過急湍雨餘春色尚生寒江神本具憐才意肯
借東風送子安

舟抵華陽鎮

春帆集
華陽鎮引布帆來睡起船窓眼忽開遠憶吾民果何狀去
經半載漫相猜圖方欲繪

恩先澍征許全停色可回江水漸消人似昔客衣知未染浮埃
入城日紳衿遠迓且有投詩者口占二律奉柬

十月專城愧俸錢百艘橫截楚江烟人情去日同來日
王事新年接舊年雙鬢未能隨雪化寸心猶可伴燈懸相
逢若肯重相念第願春回麥隴邊

一冬風雪守襄河痛入雙趺卧養疴纔見紅旂朝走馬又
聞白屋夜橫戈酒能生病原宜斷詩到言情不廢哦歸與
諸公共商確卷中佳句閉門多

宿小停雲館聽雨

一葉舟中已作家萍蓬誰與慰天涯小停雲館春將半開
過梅花到杏花

燭剪西窓坐不眠雨聲點滴枕函邊聽來一夜頭堪白無
數災黎盼麥田

華陽鎮卽事

別緒勞人覺倍紛半年無見復無聞也應避地同牛僧且
喜開函對馬軍不可以風林表雪何傷于月雨餘雲春光

已綠汀洲草翠羽紅襟各一羣

湘艦明府招集寓邸時方請病且名其樓曰人倚約
與同登率成二律奉柬

散罷常參客到門風吹紅杏點芳罇城居喜占林泉樂春
暖能全雨露恩牆外好山開錦障樹頭晴日擁金盆范陽
族望桐鄉宰別有心情許共論

朗吟同倚最高樓樓上人今未白頭掃舍心原師郭泰從
軍行肯讓王修嘉謀贊處風生席夕膳馨時月滿籌我是
天涯無賴客江山指點坐消愁

鄒靜齋新葺藕香深處於去歲孟冬九日作展重陽
之會今年閏二月予歸自楚北見佳篇滿壁恨未及
與率成二律奉柬

去年聞作展重陽壁上琳琅不計行桃塢已隨林杏鬧菊
籬直接畹蘭香人能吹律心偏熱天許看花福正長前日
坐君修竹裏轉疑風景似瀟湘

藕香深處共憑欄未見荷錢點點團四面風催烟柳綠一
池天占水雲寬不妨鄒湛爲從事時有臯陶作上官參罷
曉衙閒跋履呼船誰與對持竿

盧湘艤周子野俱爲題照賦此誌謝

此身原是月中樵徒有春光紙上描卅載塵顏煩潤飾兩
家新句鬪瓊瑤早從大歷知才子稱向江東壻小喬客舍
一燈紅耿耿微吟不覺雨連宵

差回後兩耳重聽戲成二律

奈此兜元國紆迴路不通愧非師子野愁作阿家翁響失
移床雨音沉度塞鴻頻將嬌女喚

嬌女耳神名呼之可治聾

時或返吾

聰

何敢恃爲目未知誰盜鈴易伸非白論空演太元經營燕
自相媚風泉難獨聽蒼蠅聲盡息不爲守黃庭

憶梅

春光今已過花朝回首孤山路正遙看去幾番勞想像折
來誰與鎮誼囂夕陽古渡長流水明月前村舊板橋到眼
終嫌桃李俗一時難得此風標

夢梅

紙帳春回燈不知醒來空爲說相思參橫月落有餘態疎
影暗香無定姿曾以神交通枕席儘容清氣沁心脾含章
殿裏飛成片千載魂消點額時

春山集
畫梅

買盡焉支不稱渠幾枝繁碎幾枝疎霜生吳老揮毫後月
印花光落墨初聚五攢三徒有說美人高士總難如羣公
那用頻翻譜收拾元功染太虛

吟梅

吟得詩成客滿堂好花身價賴詞章橫枝欲動池邊影數
點爭飛紙上香踏雪何人工刻劃探春幾處費商量匆匆
尚具巡檐興坐對紅粧倚畫廊

題蹴鞠圖

青巾黃袍者宋藝祖對而蹴鞠者趙中令衣紫者
廼太宗居太宗之下者則石守信巾垂於前者黨
進年少青衣者楚昭輔

尺幅淋漓足生意寫出開寶年間事開寶君臣好身手政
平往往共遊戲笑語聲疑聞九天祥雲護衣日照地絕技
寧輸曹子桓餘風直到宣和帝黃袍一加十國淨玉斧偶
揮六詔乘龍行虎步果英物兒終弟及畱秘記半部書傳
趙韓王雙圈眼識黨太尉惟石旣楚皆可兒回軍都與陳
橋議散錦團花極飛揚趕星捉月分向背頭籌奪得爭歡

呼么磨亦可關神器君不見一毬起一毬落兩旁觀者俱
不弱五朝八姓如奕棊倉卒李鷓連郭雀習勞寧厭筋力
痛投石趨乘終嫌粗鬚眉顧盼森欲活媿美成周勿逸圖
錢禪新得家書有詩紀事因用其韻

敢云多病故人踈張子談詩數起予三載我空嘗宦味萬
金君喜得家書皖城珠乞長腰米楚水盤艱縮項魚累到
友朋吾可想徒將詞賦傲相如

談禪今已悟真空捕影誰能更捉風與世無爭安偏強問
心何愧少圓通夢消池草層層碧愁裊庭花片片紅各有
離懷言不得一春芳訊感羈鴻

旣題呂仙像贊後復系以詩

飛昇知己及千年瀟灑蓬萊第一仙袖裏風雲真世界眼
前冠蓋假因緣養成活虎生龍性引得嬰兒姪女眠好鍊
金丹三萬斛人間處處起顛連

盆中牡丹

此是人間富貴花得來誰不羨繁華無卿便覺春光瘦有
我偏將白眼加紅雨半軒欲軟玉畫屏三月擁明霞庭中
紙上休相如各抱濃情任客誇

屏上畫牡丹與盆
中花互相映發也

既成前律後硯有餘瀋泚筆爲此並未起稿打油釘
鉸增僕而三矣

春風春雨皖公城分得嬌姿不問名月過簾前窺國色日
高花下驗貓睛染衣香忽從天降酣酒人疑向曉橫我是
寒儒兼傲吏有君相就便多情

拈洛陽字復成一律

自古名葩首洛陽沉香亭上好風光成家詎必歐姚魏選
色徒分紫碧黃難得相扶餘綠葉可能兼賞到紅粧瑤臺
金屋非容易手繫龍寶作賀章

三詩意有未盡以此補之花如有知亦當解語也
老眼相逢未恨遲嬌多那用買胭脂栽從池館難爲地倚
編闌于不記時淨洗寒酸餅大雅平分金粉入新辭香溫
茶熟春如水皎皎親披玉樹枝

題畫松

風雨名山裏堂堂古丈夫甘從不材老梁棟未全無

題周石落晉遊草後並感忠毅公遺事

開卷如逢故并汾我舊遊與君同作客萬里各悲秋春入
綿田冷烟環介邑稠河山三晉美都向錦囊收

落落餘奇氣洋洋有大篇孤館他鄉酒寒霜塞雁天看人
明月老明月看人人看月望舍白雲懸集中多思此日重
回顧詩名已十年一聯鄙意極喜之

言念先忠毅難爲後啟人英風動朝野餘烈振冠紳恥作
千夫諾能留一代真金壇好師弟名重拙謀身

次萬鐵峯南昌見寄二律

好士常懷侍御風堂堂上將敢相同若逢文字心如鏡果
遇驪黃馬盡空一代高名難獨享千秋吾道豈終窮因君
更發陳人感恐乏清修繼二公謂奎將軍雲巖
錢侍御南園

有月才能對影三官情宦味已深諳朝天未入羣仙會避
地思尋古佛龕詩取寫懷難免俗山如到眼不辭探故人
遠道勞相念已具嵇康七不堪

送萬鐵峯還滇

相違經半載訪我皖公城跌宕江山氣艱虞道路情梅關
香引蝶珠海浪橫鯨芳草朝雲墓詩成月共清
不可無詩送中年感易冬官場供一哂歸路復如何君致
相公曲我翻漁父歌九龍池畔待卜宅禮維摩

同鐵峯登迎江寺浮圖次李少白韻

爲送鐵峯去清晨尋勝遊江山環一塔城郭壯千秋芳草
無邊綠春波不斷流頽垣支敗瓦淒絕皖公樓
極頂同吾上憑高指舊遊花開梅嶺月猿嘯蜀江秋觀豈
迷平等人皆惡下流仲宣亦詞客只解賦登樓

次疊西阿先生自京枉寄元韻

相逢莫話種桃年豈有真仙慕散仙萬古關心幾興蹶一
時過眼各雲烟風生摩詰詩中畫月照成連海上絃正值
永和修禊日可將觴詠集羣賢

雷池昨歲缺西成難副窮檐望雨情爲令空傳三異績讀
書長羨二疏榮山堆楚塞雲無影浪湧吳天月有聲百舸
橫波親領運攔江齊唱大隄行

凜凜埋輪請劍年直聲驚起大羅仙陳書曉拜中天日執
簡香分泌殿烟當路竹原無曲筭傷弓鳥豈避空絃彩雲
別墅雲橫彩退食時中酒聖賢

謀身自歎一無成難遣中年以後情也欲逃禪學蘇晉徒
聞稽古有桓榮馬奔長路惟憐影鶴戀青天易發聲雙耳
半龔雙足蹇不當行處不曾行

劉璞齋招飲官舍卽次壁間徐柳塘韻奉柬

春帆集
三年皖江上未得一相尋誰識城東路官曹倚茂林初移
文舉座如見漆園心紅過翻階藜餘香欲滿襟
閒居少塵事徒步越林垞花鳥仍三月江山此一亭雲連
芳樹曉天入短檐青卅載通門誼無嫌跡屢停

和丁仙坡落花二律元韻

開落無端各有緣最難消受暮春天登樓繾綣餘今日把
酒殷勤記往年嘯罷流鶯飛絳雪蹴來雙燕襍珠鈿紛紛
似葉兼如雨爭繞佳人錦瑟邊

已是紅稀綠暗時斂華就實未嫌遲影翻魏女筵前舞香
入邱邱詠後詩與我相逢原娥媚干卿何事獨離披明年
試向東風祝多發新花上故枝

鄒靜齋招同周桐城延旌德丁葵源小集靜齋率成

二律

一片空明地頻來繞畫廊天光常在水塔影欲窺牆春老
紅全瘦林深綠亦香此間有真樂不必羨濠梁

請病今逾月芳筵兩見招宦遊皆異地言笑有同僚華燭
燒頻短雛鶯嬾更嬌時喚歌童不至多情丁敬禮把酒意搖搖

程仲芳以詩見贈言多溢美次韻答謝

說劍神馳落雁都雕弓寶馬笑迂儒才非繭客勞抽繭智
類壺公欲隱壺脫手軍儲通楚塞關心民事感吳趨江城
半載頻來往新聽鏡歌達九衢

爲政難禁老大時粗官事事費支持烹鮮自喜刀方鼓斬
草何期蔓漸滋日異夏冬忘畏愛身兼父母溷嚴慈雲連
矮屋低頭入敢望循聲到遠陲

蝗飛曾道不爲災往蹟填膺日幾回塘堰已枯雲似火丁
男相對面如灰撫時偶覺陰陽舛育物全資造化該三度
陳書惟盡職

皇恩自向九重來

催領新稅上楚天三冬康濟有諸賢空圖鄭俠流離譚問
讀莊生內外篇千里幸能回涸轍一杯知未飲貪泉呼牛
應馬終何礙大道從來重左旋

未得揮戈似魯陽凍雲晴雪運租航遙山三面環清沔歸
雁千聲下碧湘孤艇春來惟自泛故人天末遠相望縱籌
撫卹空勞力此痛何能一日忘

三逕田園已就荒好隨牛僧住東牆病夫歲月閒居賦
盛世勲名醉白堂矻矻謀身畧溫飽區區報

國侍詞章昨非今是誰相信許向交遊述五常

題周石苔秋江曉夢圖

雲來江樹青月落江天白飛鴻時一聲驚起舟中客
牛渚袁臨汝赤壁蘇老子秋氣感人多濛濛半江水

口占戲贈檀三雲瑯時悼亡歸自京師

招魂難返段安香辛苦檀郎夢一場回首京臺騎馬路木
鷺洲畔弔斜陽

柬李少白並懷王北谷太原

五字詩無敵才名二十年春風吹皖水一鶴下青天跌宕
唐孫逖飛揚李謫仙我狂君更達相對各相憐

渴驥驚蛇勢風檣陣馬蹤雲消懸白日壑斷挺孤松意得
泉成酒神來筆鬪鋒人間王北谷獨聽晉祠鐘

程三橫山以詩見贈依韻答謝

側身天地此蘆廬鹿鹿義鞭趁日車未向神仙尋宛若誰
從佛祖問真如躬耕擬續歸田錄學圃兼編種樹書多病
難除文字習飲醇心醉訂交初

曾於海內訪英奇邑有翹材愧未知春水一行雲際雁青
山滿把畫中詩兼惠畫扇江流聲靜銜杯後榴蕊香飛點筆時

無事若容常問訊文章經濟兩相資

題許石樵新舊二照

華山如屏張黃河如帶結萬里而千仞吟破秦川雪歸來
逾五年精神見孤潔

識君淮水頭訪君皖城旁顏鬢非疇昔相看俱老蒼山高
河自深隨時愛景光

陸寄洲重至皖城企山鐵禪善淵俱有贈章喜用善

淵韻繼成一律

助理經年共苦辛西風分手大江濱胸中詎可無秋氣眼

底何期有恨人家寄三山萱未老

時寄家繁昌

雲連北固草長

春乃兄客鎮江別駕周東山署中相逢只解重相惜七字詩成不救貧

題楊秋浦秋山宴坐圖

秀峭點蒼山淨綠洱河水香城踞其中風俗清且美楊君
城東居山水互流峙時或載酒出泉石色盡起入秋天氣
佳林花雜紅紫借草披雲根采芳擷寒蔬倉卒置茲景來
作遠遊子遠遊固不惡况識老莊旨淮南復江北十年極
徙倚富貴須何時人生行樂耳懷君松柏心貌君邱壑裏
眞面未全非攜圖示鄉里

再題石樵梅花書屋小照

儂種寒梅三百樹手鋤明月老其間詩成不寄林君復門
鎖青山竟日閒

石樵亦有梅花癖寫作新圖遠索題何不林邊添着我騎
驢直過瀑泉西

初夏蓮舟開士招同張鑄堂明府李少白邵瀨水二
上舍小集迎江寺卽次少白壁間舊作韻

來往知無數羈愁入杳冥人烟浮樹白山色渡江青宦迹
觀塵海交情感客星僧閒能好事對佛引香醅

出郭心無着旃檀發古香波聲搖皖口天影落池陽雨過
苔爭綠年豐麥肯黃簷前雙燕子時倚北風翔

坐迎江寺寄懷涵明和尚

熟梅時節雨紛紛晴覓孤亭坐夕曛江漲夜添巫峽水佛
樓高接皖山雲鐘魚響寂消名利香火緣深黜見聞窳堵
坡橫霄漢上不知何日果逢君

次謝曹扶谷明府見題詩後集元韻時新移對寓

前歲作吏雷池濱小孤彭澤相與隣江南無數好山水時
共筆硯爭鮮新攬衣未坐茂叔月舉扇徒障元規塵軍書

火速刺閨下連朝疑鬼兼疑神轉餉萬二千石耳篙工郵
卒同一身犒士遠愧虞彬甫殺賊終思溫太真黃鶴樓西
兼旬住百艘上溯魚梁津自秋逾冬乃畢役歸來面目不
自親皖城辟俗屏聞聽胸空四極包八垠災黎滿眼難遍
活屈指無計消勞泯槐國轟騰接柯郡意車塵碌連尻輪
我生好直恥匿垢發言寧恤嗔者嗔扶谷曹二浙海彥高
懷曠度非今人詩成羞拾牙後慧葩騷子史交沿巡花則
有香竹有節豹容見斑龍見鱗興酣據席幘每岸揮毫對
客襟常振方寸直能起五岳逸氣端欲搖三辰安得如公
十許輩賡歌漸使風還淳千年此事等聚閱誰歎詛楚誰
過秦手挈乎化鑄雅頌以屈爲屈伸爲伸清漳易臥公幹
疾環堵深憐原憲貧元言落落五千字屢禾蝥蝥三百困
張南周北肯對字竚看九夏回陽春挑燈袒臂無不可博
辯那惜勞齡斷赤日炙面汗淋背曳裾休羨朱門賓

次答雪湖明府見寄之作並書集後

清淮流素月路入楚天涼
近夜風猶爽經秋樹易蒼
久違極傾倒中道得相伴
一別成三歲無從更引觴

刃自礪邊發舟誰壑內藏
遠貽青玉案空佩紫荷囊
予亦

懷微尚人爭羨拍張矮檐頭白盡無復昔年狂
地原兼赤緊詩獨詠蒼茫問俗周南畝開樽拜北堂味真
同菽粟心已薄膏粱映日文章見光生錦繡腸

廖鍾隱明府以詩辱贈中多知己之語依韻謝答

八桂堂連獨秀峯幽探知不廢壺鍾雲邊路繞千尋壑天
際花迎五尺筇夢入灘江餘繾綣人來皖口慶遭逢茂先
老去多顏放笑倒橋西陸士龍

相看我似賀知章未解金龜酒肆旁世事難爲河伯婦小
家空嫁汝南王天回楚塞雲初淨夢繞滇山月正涼雙眼
對人青更白病多翻恨不能狂

不肯人前喚奈何半生歲月感蹉跎臨文未礙微而顯對
酒空傳旨且多城近荒江豔蟹稻心勞下邑有絃歌閒居
坐盡黃梅雨時聽呼聲隔巷過

記識清標已二春老逢明畧許相隣才高共羨交遊廣詩
敏都緣性格真好我勝裁紅錦段看山思戴紫綸巾皖公
城畔人如海世味終輸酒味醇

次答雲津廣文見題朝天集二首

早歲朝天戒曉裝秦山斜月蜀江霜驅車日愛三冬煖捉

筆心隨萬里長識曲有人驚雪白登臺無客見金黃頭銜
兩伴鑪烟奏親歷承明與未央

往事關心日幾回一官蝸寄大江隈空勞未雨綢繆慮誰
諒當場跋扈才人似岫雲原懶出邑如美錦愧初裁病軀
許續閒居賦到眼彬彬盡楚材

五月十一日同人小集王氏浮遠閣卽席賦贈

安慶城南郭王園舊有名憑虛工結構隨事見經營徑曲
能容竹樓高不礙城登攀今已慣莫訝客來生
闐闐聲全息脩然遠市氛檐飛五湖水帆帶九江雲坐久
心逾靜愁消日易曛好風天末起把酒問匡君

題魯菜園吾亦愛吾廬小照卽用自題元韻

清閒儼扣白雲扉春入園亭一逕微紅雨曉滋花影濕綠
烟晴罨樹陰肥書中日永人難老陌上香濃客乍歸吾亦
有廬天際結秋風回首未全違

耳疾漸愈戲成一律

世人皆信耳吾道豈矚心萬籟偶然靜希聲何處尋有無
三弄笛是否七絃琴雙牖從茲啓幽田感足音

次答曹二扶谷移居見示元韻

聽鼓趨公候早衙無由淪李更浮瓜相依易作長鳴馬並
載難尋薄笨車朱竹垞曾誇卜宅田山薑亦賦移家誰從
讓木廉泉裏細爲詩人紀歲華

和程橫山拳石山房題壁二律

清流環茂樹吾亦愛吾廬不可居無竹依然出有車一行
來作吏萬里獨愁予那及歸田好長興自把鋤
未得傳三善何由受一塵因君此邱壑憶我舊林泉風雨
生吟榻江山倚醉眠莫嫌拳石小結體太虛前

養疴省寓扶谷移居相近予數以卷冊索題乃應者
愈敏求者未已遂有曹癖之謔借以自解辱詩見示

依韻答之

一生能得幾人知落紙源源有妙辭學步終容依大雅分
曹何敢恃偏師鼎滋牢味難緘口座引珠光易展眉許作
雲龍共追逐相逢轉恨十年遲

爲周石落明府題先忠毅公季侯玉印

石落手持半幅紙芝泥炯炯射眼紫云我列祖忠毅公季
侯小印印於是消磨塵世二百年轉徒蠻荒六千里粵東
購歸襲皂袂寶重直可球圖儼神燾之際明失綱太阿倒

持混臧否茄花委鬼讖遂成趙嬈曹節禍伊始惟公抗疏
糾二姦坐贓逾萬寃莫洗筋折脉絕精神全那見崔許活
草裏乃者誰氏作此印玉情溫潤文粹美青縞綠綬交相
輝豸冠繡服時共倚一代君臣方夢中數典爭致漳河壘
甲申烽火都門紅龜鼎已移廟社毀何如此印傳千秋人
間正氣永不死錢王錢券趙兕觥長伴三家好孫子

曹扶谷爲題紅梅便面二截句蓋有謂也因依韻成
之

顧影何曾敢匿瑕一枝竹外有誰誇年年許漏春消息羞
作人間頃刻花

三生願已證圓通猶向枝頭着意紅不是偶然容一醉春
光都付雨聲中

題桃李園圖

桃花能紅李能白月色溶溶映杯碧寫作芳園夜宴圖一
千年來無此客錦袍烏帽眞仙人興酣落筆如有神詩成
盡出羣季手一序遂可聯天倫世間何處無桃李太息春
光若流水羽觴欲盡瓊筵空眼中之人吾老矣勸君何不
秉燭遊有花有月堪忘憂莫教風雨入愁思坐對青山搔

白頭

題皖江送別圖送王瑞菴之任湖南九谿營遊擊
江漢風流古所聞王家又見右將軍去從瘴雨蠻烟路重
策青霜紫電勳挂席秋橫皖江月建牙高壓九谿雲大雷
池接三湘水時寫新詩付雁羣

雲津廣文見題詠史詩後次韻答謝

仙多言劫佛言因持論難容僞亂真出入千秋有疑案支
撐一代幾完人此宵只可談風月前席憑誰問鬼神好向
當場高着眼紛紛不少畫麒麟

自題汎舟圖

斥堠勞相迎江山坐引領征帆挂北風遙帶飛鴻影
歸時桃花紅去時楓葉紫不見采蘭人相思若流水
橫山以畫扇見貽賦二絕句柬之

拳石巍然研匣前幾回空自悵雲烟胸中分我閒邱壑同
過人間六月天

蕭齋無見復無聞執扇搖風日易曛徑合移家此中住曉
看紅葉晚看雲

過訪鄧完白有贈

落落鄧夫子高情惟鶴知閒同霜比潔靜與月相宜文欲
追秦漢書能逼籀斯皖山山畔路應恨我來遲

紆曲城西寺人因訪隱來野橋通活水秋日上蒼苔更覺
鬚眉古難將笠屐陪偶然圖邂逅恐有細人猜

律謝答
愁幢上人皖之古德也為余題照恨未及面率賦二

第二原非我前人謂小照為第二我塵顏愧遠公肯容參妙偈知不
墜宗風遊已周方外神常寄卷中可山隨杖屐相與證圓

通
雨歇江天晚歸帆泊水濱照衣閩海日晴歸自沾屐虎山

雲豎拂花爭落談經夜屢分回瞻高隱處鹿豕可為羣

洞庭舟中雪夜懷人詩八十二首

滇西師範荔屏

望江檀默齋先生

檀公老去方歸里十載相交不獨詩黃鶴樓西兩年住懷
人應恨我來遲

昆明高羽豐先生

彭湖水接洞庭水歷落如公真足思
放罷曉衙無個事玉
梅花亂點霜髭

昆明楊晚亭上舍

雙塔寺南三度過筆床
茶臼手親提閉門日寫秋山賣風
裊炊烟出屋低

昆明李達夫孝廉

此才天授非人力筆利如犀水亦分
陷陣幾番憑出入文壇今見李摩雲

保山袁癡髯二尹

癡髯畢竟癡於我老去猶耽著述工
除却詩文卽朋友半消塊壘酒杯中

昆明陳懋齡干戎

相逢不作弓刀氣盤錯時更胆亦真
學佛何妨兼學藝知君原是有心人

浪穹王酉山進士

櫻桃宴罷且歸卧虞世南稱行秘書
坐擁皐比攜有妾蜀山青入畫眉初

石屏朱笏山孝廉

止酒原非君本意不能馬稍有清談
此時也自衝風雪好覓壚頭博一酣

昆明李仰亭布衣

李生畫筆吾鄉秀山水蒼茫竹石圓一自朱門拂衣後棲
心塵海醉雲烟

昆明萬香海中翰

卷帙盤胸時數典詩文到手卽成章廿年悟得書三昧落
紙居然見晉唐

晉寧趙覺莊解元

春首南來冬北去一家齊上孝廉船自是空囊各如洗看
君裘馬轉翩然

昆明文望山廣文

望山意氣雄吾輩詩興時隨酒興生數罷落花坐臨帖
寒暑冷此時情

昆明錢前村秀才

公子秦川悲蕩落撐持家累走倥傯天心堂裡天心見一
夜香生鼻觀中

石屏羅琴山文學

去秋擬晤琴山面我得來時君已歸遠寄新詩與靈藥魚
緘手折語依依

同邑鍾繩其秀才

猶堪共語惟君獨
留宿高齋慰問親
到底能存男子氣
照人肝膽自生春

同邑蘇栢軒明經

一代清門兼老輩
眼看兒女易傷神
次公自是心如口
慣作當場使酒人

同邑蘇硯北拔萃

去春賃馬來相訪
蕭寺談詩到夕陽
臨別未能親致訊
錦屏分贈走諸郎

同邑蘇曉園從甥

絕倫髯早遊仙去
冷眼留兒閱世情
無忌何妨真似舅
艱難中尚可謀生

永北譚篋圃孝廉

孝廉爭似譚篋圃
稱與南園共主賓
豁達吾猶憐大阮
罷官老作喪明人

同邑田師孟孝廉

文場弱歲曾追逐
此日相看各老蒼
晴雪一天湖水碧
漢京題柱感田郎

蒙化張景園孝廉

景園家世傳詩畫父是漁洲祖退菴花萼樓頭萱正茂爭
揮水墨寫雲嵐

蒙化張翹岱孝廉

深心嗜古張翹岱語快如風舌有銛相對我真成笨伯錦
溪春鎖讀書堂

同邑李元章廣文

二百年來無此作三千什外得其真元章贈予句新詩寫贈吾
終愧當世何期遇解人

同邑李韋齋文學

半山堂上半山子弄酒拈詩狂未休開過玉梅紅到杏離
騷讀罷曉科頭

同邑李柿園孝廉

觀音山下一盃酒情到臨歧知更真閉戶看人爲令僕慚
予亦自逐風塵

同邑劉晴崖孝廉

清瘦如君偏耐冷單裝怒馬雪中驅迢遙此日黃河岸買
酒旗亭定憶余

同邑袁伊村明經

三次容過尋樂處課花兼續種魚經親如伏勝兄龔遂滿
洒君家養志亭

同邑李筠園秀才

看山訪石常相偶插架琳琅酒一尊屈指吾鄉諸貴胄慎
餘堂上典型存

同邑楊南村孝廉

八十老翁猶健步詣余兩度往來忙挑燈夜輯春秋傳龍
應山深月影涼

同邑許丹山孝廉

同君竟夜祠中話喜有慈明可應門對客莫愁家計薄老
留經史腹中溫

同邑段南湖孝廉

曾從未座窺年少老馬何知肯問途惆悵南湖湖上望斯
人豈合在菰蘆

太和趙晴虹文學

長郎懿子義子也時方同行

晴虹靜者心多妙三十年前臭味同君尚多兒我無子從
今便合竟稱翁

河陽鄒立齋教諭

前懷人詩
六
兩回抱病眠君榻醉我清醪索我詩斜日宣威坊底路勞
勞未得話心期

錢塘陳小鐵上舍

一枝玉樹庭階物遠犯冰霜走百蠻王謝家風嵇阮態每
相逢便憶勾山

安福梁鑑亭幕長

葉榆城畔春難賃君是梁鴻少孟光自詫丹成可沖舉爐
中未見有芽黃

同邑李碩卿孝廉

竹林弟子無多在才美如君定出藍同撫斷經余更苦有
禪誰向老婆參

河陽段可石進士

身是揚州舊司馬買舟曾共泛山塘一官歸作經生長說
到歌聲尚斷腸

昆明宋警堂孝廉

倉卒京都煤火炕剪燈相對賦新詩歸來兩載圓通巷寥
落何人訪故知

永北朱佩旭山長

前懷人詩
絕塞憑君獨往還黃雲白雪玉門關剖符何似傳經好
昔堆盤詠小山

昆明余歛齋監院

道氣居然攝下流辭榮不作小諸侯束修羊好堪娛老平
占西林任白頭

錢塘張補裳二尹

曠代詩人張補裳哦松又到碧雞坊宗風杭勵知猶在袖
裏常懷一瓣香

臨汾張春帆明府

鄉情曾共指汾河六月陽瓜冒雨過未必一寒真徹骨遠
分清俸感人多

光州徐南村刺史

相逢曾贈我新篇南北分馳各五年昨向省門詩再作不
教人隔大羅天

陽湖莊澤珊司馬

山城四月碧蓮池較射敲詩酒百卮身白揮毫兒弄墨一
家風雅盡堪師

晉寧何魯巖進士

心經寫寄圓仍秀已賦瓊林遇轉窮人世功名多意外
劍細何必咎苗公

晉寧方夢亭廣文

會垣一晤垂鞭去微弄吟髭格倍清同是北來先半月
看花知己過樊城

同邑鍾特菴刺史

官職特菴今已遠孤城老結允文軍利州城裡一宵話
十九峯飛白雲

昆明陸華浦明府

玉山水水清如許所謂伊人宛在茲半日浚儀齋畔坐
買舟相送棟花時

雲縣熊厚菴明府

幾見牛公容杜牧曾傳杜甫客嚴公左雲舊是彫殘地
借箸誰憐補救庸

蒙化李竹居明府

曾記揚帆溯東海半年鞅掌竹同居悠悠幾被猪肝累
雁蕩山差不負余

同邑谷西阿黃門

堂堂柱下惠文冠老向
熙朝作鳳鸞封事每投皆報
可君臣遇合古來難

建水倪松泉員外

鋤經吾舊識倪寬校士并汾月正寒闈裡若逢王北谷居
然屈宋作衙官

宜良嚴匡山庶常

十五年前賦盍簪謝家蘭玉各森森傳來已作于思相怕
被人呼小翰林

貴筑花曉亭庶常

才華當代有花綸弱冠蜚英領縉紳雛鳳聲原清老鳳相
逢吾轉愧陳人

安寧楊碧泉侍御

農曹文苑各冠簪豸服恩承雨露酣諫草焚餘時剪燭書
聲清出景忠菴

河陽楊篋山郎中

廿載秋曹秩兩遷司倉不用買關錢緘來家集親雙管校清
德還堪庇後賢

晉寧張淇洲員外

前懷八詩
七年望重白雲司辨律平刑在善疑莫便隨人輕出守鍊
才須趁黑頭時

蒙化劉輝山主政

我歸君去等賓鴻剪燭彌城夜已中老記嶮巒山畔路對
床風雪感飄蓬

同邑李菁園秀才

根蟠仙李舊家郎走徧天涯鬢欲霜投老居夷原失計白
川終是彩雲鄉

麗江牛西堂廣文

我似溪南辛敬之得逢美食色先怡巨津城外連宵醉大
嚼猶嫌下箸遲

太和陳西桐指揮

西桐本自擅通材走馬南城日暮回且莫逢人輕叫屈鈍
翁曾作此官來

昆明錢芷汀巡檢

早歲相知前歲親雄才今倍覺嶙峋詩情筆勢都無敵稱
與周公傳畫人

同邑袁韋塘明府

前懷人詩
高樓記共賞春燈火樹光搖最上層同是元宵今夜惡北風吹老洞庭冰

太和沙雪湖明府
楊門今更有侯芭滿縣香飄手種花試向江南望江北十分春已到天涯

通海楊筠溪刺史

官職因君亦自豪廣文今已夢三刀州居四大繁華地赤蓋斜撐曉雪高

河陽郭浣溪司馬

官齋兩度夏兼冬鄉誼偏於我獨濃同是笏巖門下客有誰更餉蜜雲龍

鶴慶李珮九刺史

書生骨以鍊逾堅官好多因不要錢名達九重膺特簡崇朝霖雨泰山前

鶴慶莊簡菴太守

朱幡熊軾總尋常難得椿萱共一堂按部歸來河解凍行山雲護綵衣香

羅平陳潤軒明府

高邑城曾三度過同年情較別人多近聞已向任邱調北
部新聲奈爾何

彌勒張東園明府

千里駒看汗血良投閒莫歎鬢成霜東山再爲蒼生起許
我相從日觀旁

樂平何不園刺史

記同京邸聽琵琶分手雲天各有涯重到趙州城裡晤甘
留舌本一甌茶

安陸彭俊三明府

白雪由來擅郢中武林相晤太匆匆朱家橋下分金送兼
惠歸帆五兩風

閩縣葉皆山參軍

卅載浮家寄武陵桐鄉回首感難勝前年我作傳書客春
草茫茫水一稜

休寧吳辛娛司馬

海防廳爲記名遷歷刺方州十數年無限臨歧珍重語何
殊送炭雪中天

昆明來翼亭孝廉

邂逅長途有數存
煩襟滌罷酒重溫
同床一夜雲濤寺
風撼波聲直到門

呈貢戴華峯州尉

梅花已向董園紅
置酒相招有數公
君是王門戴安道
碎琴風格不嫌同

樂清陳霞山總鎮

時清歸老舊元戎
半載江城禮數工
坐看兩郎各騰踏
芙蓉驛畔醉春風

永嘉張星槎司馬

永嘉山水擅清道人
入華軒步履幽嬾
向滇南計鹽莢總
防今又到蘇州

仁和湯絳城參軍

燒笋羹蕓整二旬
雨聲連夕易傷神
才晴伴我遊山去
忘却身爲浪迹人

永嘉陸有文書肆

書中原自有神仙
百首新詩手代編
無事輒來堂裡坐
春愁翻被柳絲牽

貴池曹麟臺寺經

淳于髡是滑稽雄爽入機牙字字工閒撒胡葵破岑寂不
教人老病愁中

樂清徐星聚秀才

己未冬予主其家至
次年三月方得歸

一樹紅梅兩樹茶連宵開徧雪中花相思不忍忘城北轉
勝前年客憶家

法時帆云纏綿悱惻之音達以夷宕之
筆淺處能深小中見大此詩人旨也

舟中雪夜懷人詩書後

若夫征途雨雪易銷游子之魂落月屋梁恍對故人之面
戴宏正金蘭作簿徒記交游杜少陵春樹題詩興懷知己
未有望雲千里數別夢於長宵在水一方寄相思於短句
者也爾乃半船書畫採澧蘭沅芷之香萬頃烟波攬湘水
衡山之勝洞庭雲白帝子安歸江上峯青美人不見撫巴
陵之氣象真有萬千憶明月之光華剛逢三五豈期同雲
密布狂颶頻來風颯颯兮打頭波濤數尺雪霏霏而在目
瓊玉千堆淒足驚魂難作逍遙之孟浩寒真切骨徒爲無

卧之袁安對此蒼茫嗟哉留滯烏能不感懷離索望切天涯藉慰牢騷神馳異地也哉

荔扉先生當代名才吾鄉老宿壯游薊北文章得燕朔之雄偶歷江南風雅擅齊梁之盛到處門階似市往來問字之英鎮日冠蓋如雲高會酬詩之侶雖文人本色重在謳吟而才子多情不忘故舊遂瀉胸中之雲夢遣此愁腸追維往日之風流破其岑寂或粉榆里巷孔李舊屬通家或瓜葛門楣潘楊原爲密戚或扶輪大雅黃門烏府之英或宏獎人才郎署詞林之選或三刀五馬舊雨殷殷或半刺

一官聲名藉藉或轅門投轄將軍之禮數原寬或道左班荆俠士之音容如繪或秦川公子高陽酒徒或畫苑清才詞壇雋品或同上長安之市路隔三义或擬爲鄂渚之遊歸經兩載或彈琴製錦種花先到河陽或冷署寒毡視草仍留泮沼或後生髦俊老輩儀型或文字知交烟霞卧客莫不形之歌詠借以達其纏綿斯蓋較襄陽耆舊之傳饒有風神比江淹賦別之情尤爲悱惻者矣僕本寡交君真古道少從末座始得知名今喜同舟惟工酣睡爐灰未冷周興嗣千字文成蠟炬猶紅李青蓮百篇詩就可歌可詈

如見其人此景此情大難回首四十年賓鴻踪跡宛在毫
端數千里尺鯉音書胥歸枕畔喜今夜禦寒有物拈來如
雲漢之圖恐他時長夏無聊讀去尚風霜之氣嘉慶六年
正月廿二日和軒愚弟吳怡拜跋於岳陽樓下

荔扉先生後懷人詩序

跼月圖披深情可掬停雲館啓逸興過飛悵綿邈於關河
數生平之縞紵每逢清景元度堪思不少新詩微之欲寄
則有鄒枚舊侶京洛名儒擅王楊盧駱之稱爲南北東西
之客或浮沉宦海或跌宕詞壇采蘋而聊訊故人折梅則
難逢驛使爾乃禪室燈青丹臺火暖神交有素命駕無由
望雲鶴之徒招憶露牛之猶牧鳴琴清夜江散騎儼作同
工落葉空山韋左司騁辭殊妙至若殘月曉風岸迷楊柳
去年今日門拚桃花瞻八表而靡從賦四愁以增歎思之

則皎如瓊樹見之則朗如玉山昔者洞庭舟次春雪宵深
大令得意而神來小胥疾書而腕脫遂得八十餘首已計
二千餘言積悃猶存長言不足倏於昨夕又成百篇思入
風雲調諧金石鶯當求友聲宛轉而逾多繭至縑絲緒纏
綿而未已念交情之孔厚羨古誼之能敦逝矣增懷感而
學步

落拓衰年憶素心天涯莊舄每孤吟夜聞海上天風壯始
信成連獨善琴

平生知己最關心朗月清風費苦吟不是賞音來意外烘
燧那有爨餘琴

嘉慶癸亥長至前一日滁州張葆光竹軒氏拜手

小停雲館後懷人詩九十八首

滇西師 範荔扉

保山袁癡髯二尹

時因雲巖師繳項往浙籌辦舟過華陽竟未肯人

老向天涯挾蒯緤片帆遙指浙江秋胸中别有酬恩事不為依人作遠遊

寧州劉寄菴司馬

寄菴序予泥舟吟謂似楚騷

炯炯清名貯帝心廿年手握太山霖離騷亦是人間物吾世何期遇賞音

晉寧趙覺莊庶常

覺莊時客慶邸

計日郵書墨未乾
念予抱病卧江干
姓名已入瀛洲籍
莫與鄒枚一例看

保山吳和軒孝廉
時客滇州太守濟南郡齋

酒態詩情不自由
大明湖畔兩經秋
停篙坐掬溶溶月
同有離懷似水流

同邑谷西阿員外

自是交情老更真
每吟詩贈故鄉人
農曹亦屈錢員外
不愧清時兩諫臣

浪穹楊鳳池選貢
去年秋鳳池至皖予赴武昌逮至武昌予已往襄陽

才調楊生本鬱蒼
幾年風雨記升堂
武昌城外千行柳
我去君來各斷腸

昆明錢芷汀分司
平糶設學皆實政也

家山寫贈更題詩
文選樓前雪霽時
善政何能除教養
循行今轉在分司

呈貢李芭泉孝廉
先客藩府後客西商典肆還滇日晤于武昌舟中

落拓長安獨抱琴
朱門鬧市各無心
楚江挂席喜相及
月黑燈寒霜氣深

河陽段可石明府

大江東去笛堪邀虎阜烟花未寂寥風月依然人欲老一
燈卧聽雨瀟瀟

寧州董勿軒茂才

董子閉關仍下帷一斑曾向管中窺此才若向烟霞老廊
廟文章果屬誰

昆明萬香海中翰

黃鶴樓西放掉遲皖公山畔柳絲絲巴江粵海頻回首把
酒同歌猛虎詞

太和李石渠庶常令弟官農部

矯矯清裁李石渠一時兄弟有誰如若從芸館看農部多
讀人間未見書

昆明吳曉林明府由庶吉士改令懷安原籍揚州

鳳池奪去轉欣然較勝寒衙寄一毡課罷農桑歌出塞秋
風未放廣陵船

長白源鍊崖侍衛尊人本達天先生守大理凡八年
遺愛迄今猶在人口

鍊崖丰骨本嶙峋舟鳳城西日守貧未必清門果零落叔
敖子亦負薪人

石屏陳海樓孝廉辛酉海樓未應挑與笏山叔近同
寓保安寺予寓德和堂時相過後也

不入當時選佛場保安寺接德和堂石榴花與槐爭艷幾
度橫襟話夕陽

貴筑花玉圃孝廉

廿六年前把臂人水流萍聚豈無因黔山原比滇山近一
樣相思月色新

彌勒樂固坪教諭

固坪與張舸園爲密友舸園卒後
搜輯其詩頗費苦思

冷趣如君不易求新詩贈我未能酬九原可作張平子欲
往從之詠四愁

昆明何純齋二尹

純齋重至安慶予已督運往楚

小停雲館話匆匆高挂春帆趁晚風到得重來秋已老君
方泛梗我飄蓬

太和李九峯學正

九峯與我同辛未縱酒高談氣吐虹三十年如一彈指掉
頭相憶各成翁

太和洪仲揚秀才

乃兄西堂孝廉身後僅餘妻女

壁人記識洪駒父洱月蒼雲喜共鮮不信祇今猶濩落阿
兄身後有誰憐

新興李性山選貢

性山近隨陳西桐刺史往山西初
大中丞以鹽法議課士拔性山第一

雅懷終不帶儒酸
姑射山旁偶駐鞍
授簡親陳鹽法議
少年今喜見桓寬

蒙化左容齋教授

百艇橫江肯共偕
秋風歸就廣文齋
閉門好續三都賦
落枕山光亦自佳

呈貢繆美中司訓

已是人間九十翁
蒼顏猶自醉西風
文峯寺畔同騎馬
無限深情夕照中

太和趙握之孝廉

握之尚未完姻住皖數月隨予棧樓西上

歸來長缺尚無家
遠向山城醉落霞
半月運租船上坐
芙蓉手采隔江花

嵩明劉芥畦教諭

別時贈藏香一束

賃屋租驢雪嶺旁
冷官如此亦堪傷
臨歧尚肯持杯送
分取西天一瓣香

天津宋虛舟上舍

八年雲樹隔津門
回首東風欲斷魂
安得真來皖江上
談詩說劍日開尊

河陽郭獻廷藩經

阿翁新守古雲中
日日高吟氣自雄
不少荔扉題句在
寄書莫放北來鴻

太和張虛舟上舍

江城日暮渺愁予
未覆張郎一紙書
跋扈飛揚俱已矣
問將何物遣居諸

晉寧萬春田明經

自有梅花指下紅
一囊兩載逐西東
高堂未得餘甘旨
禿盡千毫恨不工

同邑孔錫九明府

屈指知曾到建寧
滇山青似楚山青
君貧我病難爲別
寫罷家書淚欲零

樂亭裴璞軒廣文

盧家河上毘盧寺
三載埋頭苦讀書
今日半瓊堪博醉
掀髯花下定懷予

昆明朱雲從明府

辛苦一官金筑路
誰憐白首尚傳經
人生有子心眞足
何必書名上御屏

昆明王宜泉明府

宜泉侍酒常驚座十載聞山跡已迷同此關情楊仲子素菴

石屏任棠村太守

棠村太守吾同譜蕙苴讒成遠荷戈自是主恩容縱覽

囊中詩草出關多

成都游輝廷副總

時由安慶協擢狼山鎮

將軍兀自親文士下石人多獨手援我亦肝腸如火熱床頭金盡向誰言

昆明范時中游戎

食客如雲常滿座他鄉誼肯念維桑浮槎斷梗憑收拾把酒高談百戰場

永嘉項勉軒布衣

勉軒何減倪元鎮日日山林曳履行閒卽揮毫倦欹枕眼中從不識公卿

昆明寇伯敦明經

吾愛伯敦真靜者非因瓜葛有衰癡錢南覺莊亦肯相料

理得句時時伴木天

太和楊桂村明府

桂村善草書

桂村機警能超俗未老辭榮日閉關偶趁春風時一出筆
花晴照點蒼山

太和楊虹孫明府

虹孫丁丑進士子歿惟剩一孫榆城積書無出其右者詩有待刪草數十卷

魏巍自合稱前輩書滿臨街百尺樓樓下課孫樓上卧新
詩吟罷月當頭

劍川尹械與貢士

段家父子

叶楊兄弟

愛廬

階下常留履跡雙尹二多情尤好

我剪燈時與話西窓

劍川諸生

雙林剎古經旬頓夜夜笙歌坐月明何事感予爭眷戀風
吹別袂出南城

太和錢雨村干戎

雨村四月西軒住清曉臨池夜讀書消却少年刀槊氣材
官羽士更誰如

太和楊炫也布衣

予昔與西阿竹林研北柳村簪屨科歲試皆主其家

故鄉無數飛騰客都向楊家認歇家近日交遊半凋落白
頭相憶各天涯

太和劉善白秀才

乙卯秋隨予入都聞訃後荐往沙雪湖署中亡未歸里

蜀道秦川艱跋涉相隨萬里作勞人皖城亦是曾遊地俗
漸紛華吏漸貧

同邑石華青貢士

華青爲丹崖先生長君四十外猶
艱于嗣近聞已生一子

卅年相眎如兄弟友誼親情分各深餘慶由來緣積善生
男知慰九泉心

浪穹楊冠南文學

冠南辛酉落第仍讀書菴中庚申夏招與
鄒立齋同遊今立齋已成古人

楊生招飲碧湖上一徑綠陰花笑菴存歿感人經四載書
聲依舊滿雲嵐

河陽楊頤朋上舍

丙辰丁巳予與頤朋同寓太谷陽
曲署中

潦倒中能相左右孤鳴集是手親鈔江城雨歇山如黛每
到詩成憶故交

南昌謝默夫布衣

默夫辭館日寄予水仙花詩云沙
寒未必棲根穩畱取幽香奇所思

南州自古多高士磊落何人足繫思白鹵黃沙逢謝九最
難忘是水仙詩

湘潭張鏡湖上舍

鏡湖詩格自深穩海畔相從逾十年一硯依人身已老太
行山下大河邊

昆明陳仰山二尹

仰山由利津令降調奉母家居者十餘
載今補丞臨海七學士其園外山也

拋却鄉園好光景抱琴海畔獨哦松草堂花竹知何似顧
影空橫學士峯

太和張文山明府 文山令寧洋近以採買局銅還滇

閩海自言為吏苦不辭萬里作銅人錦衣歸弄蒼山月醉
遍香城幾處春

太和李萼園明府 萼園由州倅升尹納谿今調墊江軍興後隨營辦事歷著勞績

追逐文場同弱冠蜀山西望與天齊頭銜已換鬚全白夢
裏猶疑聽鼓鼙

太和楊秋浦上舍 秋浦安皖之太和懷遠懷寧皆與許石樵同齋今秋浦往懷遠石樵仍館懷寧

秋浦石樵皆好友酒中趣亦許平分攜壺又醉淮南月回

首龍山感暮雲

廬江陳潤浦州佐 楚米之役委與同事予歸皖城潤浦仍在襄陽効用二十年猶未補缺

記與廬江陳潤浦泛舟同作鹿門行能于此處輕來往兩
鬢蕭蕭白已生

太和楊樹南明府 樹南新署懷遠

淮水渦水如束帶荆山塗山相向高青雲樓上曾題句未
得相隨侍二豪

太和楊乘之明府 屢有勘山之委

卸篆青陽今二載山城捧檄去來忙九華真面有誰識開
過黃花天又霜

鄧川高月村刺史

月村山輝縣升牧茶陵

蘇門山下還仍往中道相逢又許州此日瀟湘江畔路詩
情應共水爭流

江寧胡蘭川太守

予未予與蘭川同日抵鎮遠庚申署麗江予曾過訪

小舟銜尾黔灘上隔歲棲遲又雪山減從入門相慰問此
情今日杳難攀

錢唐張補裳二尹

補裳丞昆明以前署賓川州造冊延部議降調

柳洲硯廬皆老手一門風雅又逢君微官脫去輕如屣索
米知猶寄彩雲

昆明石至之明府

至之紹興人中雲南庚辰鄉試原令宜章被議補員子矣密軍營現補遷江

滇鄉寄籍稱滇友四十三年老孝廉戎馬夢回天萬里筆
峯猶似粵山尖

普安鄧蘭溪太守

公車便識蘭溪面芸館烏臺遞有名前歲朱幡新出守勞
山雲淨海波清

石屏丁仙坡明府

書法仙坡能及格拈毫心醉婺源茶院公城北濛濛雨低
按新聲蝶戀花

曲阜顏心齋明府乙卯冬同日引見心齋選興化今聞請養歸里

心齋歸卧徂徠月陋巷家風井亦香一種頭銜同日奏綵
衣君獨奉高堂

安陸余蕃皋州佐

桃花源北沉沉雨仙棗亭西漠漠烟我正揚帆君鼓柁一
般離緒兩江天

華亭王述亭文學

才華四海兼金重骨肉全家隔世看述亭贈予之句斷句贈來堪
一痛西風吹淚滿驚濤

樂清趙一泉明經己未南旋追送至橫春渡

門前一水明于染兩次相過坐品茶面別未能親打槳交
情高比赤城霞

建水吳存齋教授

不向粵西宰山水卅年秉鐸遍東西手箋慣寫蠅頭字老
眼難教五色迷

河西向竹雲明府

京華旅食思同輩雅抱蕭然向竹雲佩印秦川將十載手
拏金石訪遺文

昆明蘇喻之秀才

力田孝弟蘇仲子暇即相尋黃土坡亦有園林備清賞常
花香裏誦聲多

石屏羅樾菴教諭 昆季四人皆先就廣文

羣季一家皆俊秀樾菴詎肯作蜂腰紅綾不抵青氍貴兄
弟相承興自超

永嘉張鑑湖司馬

有佳山水能留客看過梅花又杏花早向謝庭瞻玉樹披
襟吾轉愧蒹葭

錢唐孫席儒二尹 席儒為虛船副憲令子丞合肥以失犯罪職去秋與予同運楚米

七十罷官非怪事嗷嗷誰活一家人近聞徒步霜天裏分
俸何時及主臣

貴筑高青書通守 苗匪之亂青書徒步入巢解散其黨時會垣僅弱卒五百人鄉城皆震得公始就安堵

書生也敢嘗鋒鏑百萬旄倪舌上存即此論功功豈易翻
教聽鼓候轅門

射洪傅笑髯刺史 笑髯從征五載升牧宿州

漢家介子真英傑繼起而今有笑髯百戰場邊容作牧臨
機試與酌寬嚴

陽湖左衛友明府

不作玉堂金馬客大江南北徧栽花吟毫判筆如風雨較
弩臺前日易斜

吳縣盧湘艇明府

人倚樓高人獨倚捲簾常自賦青山江湖半載挂帆去開
過茶梅猶未還

桐鄉曹扶谷明府

扶谷還浙日寄予書中有韋絃之
譬備極懇款

買船躬迓白頭親不獨詩文格調淳臨別遠陳君子義從
今合作佩韋人

臨桂廖鍾隱明府

鍾隱題于泛舟圖云一葉渺吳楚江流萬古聲又贈
予句云入官作比人屬薄適楚詩同客債多

域中山數粵西奇鍾作才人代有之我白江流浮一葉故
人為譜泛舟詞

江寧周午唐明府

午唐去年權休寧刻詩白嶽信手
拈來草乃其近集也

衣鉢隨園有替人信手拈來總見真五月齊雲巖上路長
畱佳句門嶙峋

吳江周石落明府

桐陰滿院越微涼得樹軒前桂正香
夜夜思君勞遠夢碧天如水月如霜

南昌熊鞠莊州佐

聽秋佇月各成圖我意君情喜不殊
歸向西山時讀禮一軒霜氣照人孤

漢陽陳董菴二尹

時充巡捕

亮節高懷陳董菴曉參放罷擁琅函
衙官屈宋非容易不向人前扣劍鐔

滁州張竹軒明經

垂老難拋養母心一身江海獨行吟
詩名亦可消清福莫更輕調太古琴

懷寧潘蘭如文學

安仁兩鬢已先秋未得相從十日遊
一紙飛書三絕句此情須向古人求

華容李少白上舍

賦罷離騷草亦香無人不道楚人狂
相逢大有硜硜者五字清才敵孟王

儀徵程橫山文學

令兄仲芳亦能詩橫山曾有來望江省兄之語

觀蓮約上妙香樓送我江干雨一舟每遇阿兄先致訊幾時放掉過東流

懷寧鄧完白布衣

予以竹月圖索題立書是真面孔四隸字陳寄鶴書其近事也

慷慨新陳寄鶴書山民化鶴鶴難如八分為我題真面親見中郎落墨初

懷遠許叔翹文學

放艇相過冒晚濤一編近稿肯親操詩中若覓擒王手快馬輕刀氣自豪

投子寺懃幢和尚

題于竹月圖中多禪語

一月原能印萬川懃公有偈肯相傳周妻何肉俱難斷我已年來不說禪

歙縣鄭松房鍊師

畫字詩俱臻能品

不談爐鼎不行歌紙墨香能養太和當世喜逢張伯雨誰為海粟我鷗波

寧州董竹溪檢討

令祖文山先生亦以詞臣請告家居

清德吾鄉祖又孫攤書日日閉柴門有時跣足溪邊坐忘是中朝太史尊

昆明倪竹泉編修

九月初由望江赴京供職令叔雲浦舉丙辰孝廉方正

繫纜江城誼獨親
飛鳴鶴自露精神
君家大阮吾曾識
都付風雲與後人

雁山僧用道

己未還滇僧索聯予題云只當我今行脚去何時人更打包來

淨名寺古見修持
筇屐周旋木落時
行脚打包有題句
五年誰與續新詞

迎江寺僧蓮舟

瀟洒迎江寺裏僧
浮圖七級許同登
我因無事常相潤
博得虛名到上層

休寧許暉堂醫士

龍爪葱黃山產也

畏病曾交許暉堂
皖城人盡說醫王
方書爲我千回檢
龍爪葱來藥更良

休寧汪榮升古玩店

多君熱肯不囚人
半載投閒迹更親
能向風塵存士氣
詩書轉足亂天真

散花軒主人

散盡羣花色是空
下簾日日怨春風
沾裊落溷尋常事
未必天心果不公

昔于洞庭雪夜作
懷人絕句羨頃刻
觸緒成章毫端殆

有神助看彈指流光逝水添來兩載情無數再分題吟
贈時哉又將飛絮 老友難忘舊好祇此特殷勤重賦
亦曾有詩伯酒豪來往笑談花署載軍儲秋江遠涉得
幾個故人相遇送歸舟淚眼頻揮鄉心欲訴 勞勞塵
鞅宦轍分馳撫序增思慕更翹首九重天上祥星綦布
塞月邊霜蠻烟瘴霧每懷靡及託諸比興不須寫盡銷
魂處艷春光桃李皆含露關山四望誰將萬里相思散
作片雲飛去 憐才若命交友以心者風流獨步遂并
及山民書賈羽士緇衣妙手醫和散花情悟畧關雅抱
輒生遐想都從擗管時爭附續洞庭當日維舟趣倘教
緘付鱗鴻所謂伊人感深雲樹

調寄鶯啼序

年愚姪張元昭恭跋

二餘堂癸亥除夕紀懷詩四十八首

滇西師範荔屏

前粵東臬使李隨軒師子辛卯游泮師時督學滇中係於落卷搜出遂有國士之

日歸林年甫六十

秉臬持衡各壯猷挂冠歸釣海東頭當年慘綠登龍客閱

徧桃符鬢已秋

黃門查映山師子甲午座主也由湖北學政謫養居京師

一經此日已真荒卅載師門德不忘塵滿長安紛餽歲綵
衣人臥澹寧堂

除夕紀懷詩

大司馬費筠圃師師於九月奉旨駐張秋鎮督理河務

廿年清望仰鈞衡
新卸旌麾領夏卿
三月張秋鎮旁住
又從魚腹活蒼生

敬敷山長姚夢穀先生

魯靈光殿獨巍然
莫道薪傳火不傳
力反正聲裁偽體
春風八表一青氈

少司農初頤園先生先生兩次撫滇清鹽務正士風遠接楊賓實近軼李又川

奉使常勞汲大夫
滇山雨過氣全蘇
度支更足操民命
四海從今借潤枯

粵東大中丞孫嘉樹先生丁酉春辱訪客寓見予平定金川詩極蒙贊賞

京邸衝寒許說詩
清才已自冠當時
卽今回首真天上
春滿珠江雨露滋

粵西大方伯恩湛菴先生

不隔當時上下情
楚天回掉淚盈盈
靜虛堂上頻翹首
卿月光臨八桂明

前臬使珠伊庭先生公會以數騎赴賊受重傷猶率練圍城七日奏捷皆公力也

妖氛一夜滿符離
七日功成未厭遲
自是江淮真保障
軍中空卓曲端旗

署臬使宋悅研先生憫予病惠普度丸且示以方沉痾頓起聞於接見各屬時屢道

予不置

起痼類分普度丸真容乞子得金丹栖栖江畔離憂客不作浮槎敗鼓看

洗馬法時帆先生

詩龕為南園寓館耶律文正李文正故宅皆與之近

心清合與佛同龕地近西涯我舊諳亦有前朝兩文正春波懷麓儘包含

河南督學吳雲樵先生

時以府報託子轉致涇縣

手攜玉尺按中州錦字親裁兩度投一卷新詩冰雪淨不

嫌常作寄書郵

給諫徐春帆先生

給諫為補山高足丁巳予寓西阿宅見予冰解諸七排詣予一揖日

好詩值得一拜時掌京畿道事

平津閣本隔雲霄記為詩人一折腰好士何殊京兆尹推敲驢背肯相調

潁州郡伯樊雪鴻先生

驛遞題圖詩後跋云以誌十年離合之感

淡歲相依儷雪堂驅車今又到淮陽題來佇月圖中句離

合縈心寓激揚

署觀察張鞠園先生

予請假日戒予少看書莫作詩恐其增病也

楷槎着手便生春肯向人間錄恨人書已全拋詩作少關情敢負語諄諄

總戎王午堂先生

張虛舟過九江先生問予近狀甚悉深以未曾識面為恨

虎節新移向九江匡廬山映讀書窓庾公清嘯陶公簪一樣風流壯此邦

漢陽葉雲素中翰

辛酉秋已下典試山左之命猶挾予佇月圖步行索詩

佐理軍機下值遲琉璃廠畔雨絲絲頓忘身是皇華使把卷衝泥為索詩

遂寧張船山檢討

船山寶雞題壁十八律傳滿天下佇月圖亦會辱有題句

題壁詩成字字超杜陵樂府左徒騷筆端氣自搖山嶽佇月圖空辱撫描

原任閣學賞給事中銜尹楚珍先生

時掌教五華書院

投閒不是臥山林許遂循陔愛日心連歲御書樓上坐捲簾時有鶴鳴陰

江陰繆申浦太守

衡文幾度采蘭蓀猶有囊中試草存悞盡此生緣出守瀛洲青海總君恩

河陽郭浣溪太守

三關晴雪照飛鴻此日全消戰伐功半課農桑半詩禮穹
廬知盡仰仁風

蒙自尹北牕太守

八年辛苦結團營楚塞游氛已漸平未賦饒歌先殺賊望
旗人識老書生

原任滇方伯陳雲巖師

潞河轉餉績難忘世守簪纓七葉香垂老何期逢一蹶感
恩徒自撫空囊

南昌杜藕莊刺史

德化碑高臥綠蕪遺文手搗半模糊南中老吏惟君在忍
使功名付小胥

漢軍徐鏡秋明府

鏡秋以檢討改縣令近復罷職時旣先生詩龔卽其故宅也

誰信西施果負薪珠江兩載歎沉淪近護亭上佳風月管
領騷壇別有人

賓川胡讓夫中翰

居近雞足山尊人考之先生舊令豐縣歸林爲宵人所陷遂以讒終

華首門前日影紅紫薇花畔醉薰風一科一第尋常事地
下知能慰乃翁

秀水唐北枝明府

座主晴川師長君也次君曉帆同舉甲午早卒

雁行中斷不勝秋歸臥青山尚黑頭行馬未施東閣在幾時相對述先疇

昆明錢鍾崑明府

掌大孤城界楚秦連年烽火耗精神朱顏已向軍中老如此功名足感人

濬縣周柳橋明府

李石帆顧小寧菊周各擅詩柳橋吾喜接風儀舊交更有時

巷子鳳陽趙司馬予公車舊此日相思淚並垂

遵義蘇成之明府本籍彌渡乃祖湛若先生由遵義守歷遷兩淮運使遂家於黔

身是桐鄉舊子孫一官今喜續清門相逢皖上常相就別

有親情此處存

豐潤張芷塘明府時權江防司馬

落拓京東汗漫遊逢君差足解離愁暫權冷職休含愠已有忙官各點頭

開泰劉瑤圃藩參

開持杯酒向青天幕職浮沉已十年外似疎狂中謹細閉關人頌伯倫賢

德平葛秋圃州佐

幾度寒衙燭剪紅清談不使酒尊空岳雲滇樹俱堪憶共
有離懷曉夢中

阜陽劉層廬二尹

己酉攝彌沙井適先君壽日枉駕見賓乙卯春予於沙溪館會次其

牡丹花絕句

潁川家世首諸劉爲我登堂禮數周風雨關懷逾十載牡
丹花下記低頭

望江倪廷存進士

時客揚州

揚子橋邊塔九層瓊花觀裏上元燈相思心似雷池水夜
夜隨潮下廣陵

太和胡西霞選貢

過未封胡本一門阿兄風調抵春溫老鴉關畔濛濛雨存
歿情牽舊酒痕

湖口周理軒上舍

石鐘山水茫茫峭絕松灣與桂塘畫裏有詩詩有畫修
來清福豈尋常

丹徒王柳村上舍

雪滿空江歲已春翠屏洲上一詩人揮毫別有元精在日
落秋山見性真

余ノ已襄詩

涇縣吳翼如上舍

翼如為雲樵侍讀弟時客縣治之吉水鎮與予倡和最密

吉水溝南江水橫吉水溝北寒雲生一宵燈下他鄉酒宦
味終輸客味清

雲州楊澹泉選貢

寫鴨真疑鴨可呼買舟相送費踟躕蓬窓日對新翻本貌
罷家鳧貌野鳧

儀徵程仲芳上舍

堂上吳太孺人著有織餘窓草令弟橫山亦工詩時同在家度歲

得句無須夢惠連織餘窓下錦翩翩椒花獻罷萱堂喜舉
案春生畫閣前

同邑吳軒品上舍

箱篋分陳託賞音日長畱我醉花陰一燈話盡淋漓雨四
載難忘此夜心

晉寧張濱洲太守

一麾今又長諸侯沂水原通濟水流七十二泉春已徧介
眉瀉作酒千甌

畢節邱春臺明府

往歲曾經畢節城四圍山水映人清落花詩句簪花字怪
底邱郎獨擅名

宿松石蘭臺明府

歸林未及服官年萬卷堆床酒似泉稱與曼卿為後輩憐
才人不受人憐

太和李爽齋選貢

爽齋為奎先庶常映三文學兆
虞王政之父鄉里皆呼入聖人

交友惟君秉至誠鄉閭早有聖人名庭前雛鳳爭相應猶
憶桐山老鳳聲

昆明萬香海中翰

章門書到喜言歸客裏憑誰說瘦肥珠海驚濤巴峽月都
隨風雨戀征衣

保山袁癡髯二尹

有約屠蘇酒共斟扁舟何事獨浮沉半江凍雨連天雪不
敵癡髯一片心

桐城張鍊禪上舍

鍊老襟懷老鍊同去年江漢共飄蓬錦堂今夜團圞燭光
比衙齋分外紅

寂坐長歎又一年將盡夜漏方闌天涯多舊雨何處覓
新歡情渺渺路漫漫懷抱幾會寬寄愁心一枝班管三
疊陽關 休論為客為官念平生師友聚處良難小停

雲館句會續洞庭寒乘守歲得偷閒落紙具奇觀僥倖
煞許予小子名廁詩壇

調寄意難忘年思姪張元昭鍊禪甫填詞

金華山樵詩內集序

荔扉先生天挺奇才家傳博士科名早掇文章騰五色之
輝著作新編珠玉落九天之咳敷雷池之文教民樂漸序
開冰署之詩壇親偕倡和星聯東壁利用觀光秋到南樓
喜生見獵因題而裁試草說以現身拈韻而碎天花授諸
法眼風雨蕭騷乎紙上烟雲變幻乎毫端乃際於今緬懷
疇昔公趨使院擬章則巧奪七襄寒會私庭投藻則才驚
二妙由其心原錦繡羞誇夜珠明月之辭是以語竟芝蘭
恥襲草木一輪之調王仲宣豈真宿構任教人自分携韓

退之務去陳言幾致囊無留剩在

先生視同遊戲未足居奇而小子獲讀零箋深加可惜爰
爲錄出請附集餘惟少以概其所遺卽難以見夫所學意
隨筆鍊實開後覺之津梁言本心聲克副

熙朝之雅頌也已甲子五月望日年愚姪張元昭頓首拜
撰

金華山樵詩內集

趙州師範 荔扉

書生八詠 有序

壬辰春二月予方歸自晉寧時蘇丈硯北結社紫
薇山房亡友楊一川首儼是題栗亭南池外鶴亭
最稱擅場予與簪崖皆自信弗如今年秋雨窻兀
坐收拾廢稿舊作都不省記勉踵夙志再成八律
以較往歲揮毫對客把酒臨風益不無升沉聚散
之感而予之詣轉不逮前矣凡我同人尙其正之

顛

臣軀九尺漢東方歷盡風霜鬢已蒼上殿能回天子怒濡
書羣羨酒人狂黑同江總羞海令白欠馮唐未拜郎十載
崢嶸餘短髮衝冠誰與傳昂藏

眼

一生不向俗人青炯炯吾身兩曜靈今古升沉堪指掌江
山流峙各分形秋燈映壁書全破明月橫天酒半醒平視
總難除結習神飛節俠與娉婷

舌

三寸堪爲帝者師何關艾艾與期期如逢木鐸寧容恣
吐青蓮未足奇發語終能排大難選鋒端可晰羣疑清言
枉誤人家國嚼血談天各一時

鬚

風度軒軒本絕倫紫囊除後見精神賞經天子威儀美
向時流笑語新羞與王尼同布置愛同張鶴鬪嶙峋任教
似雪心猶壯拔白空傳媚婦人

肩

倚玉全憑玉作樓幾時揮袂謝沙鷗行隨潘令成雙壁坐

蘇公出一頭任重未忘經世事身閒先負十年憂芙蓉
鏡裏如相對恐有功名似馬周

腕

停鸞峙鶴早稱雄大手從知屬巨公檄罷螳螂方倚馬賦
成鸚鵡欲生風如飛已定千秋案小試能令萬牘空剩有
閒情矜指爪一函長劍六鈞弓

膽

事大如天亦可包少年場上有知交照來已自同秋淨鍊
去還堪作鐵鼓慙許櫻鱗忘鈇鉞威能却敵壯旌旄霜文

塞馬符離路一睡何能便解嘲

腹

文章機械兩銷磨何止容人數百多千日酒醒生墨塊五
車書在任搜羅徐捫恐似將軍負乍鼓息隨野老歌不合
時宜休更怪中藏武庫本嗟峨

美人八詠

既詠書生後南池曰有名士不可無傾城遂擬八
律出示同社瑰麗明艷一時紙貴屬和者凡十餘
家余亦謬爲效顰栗亭硯北俱加贊賞然柔媚之

音終乖大雅寒夜拈此用益前愆而俯仰之間頓
成陳迹卽云唐突西子亦非所計矣

髮

何關容色易生姿螭首偏於蠶尾宜莫倚持家便椎髻難
忘覆額有青絲綠雲委地春同濕香霧侵肌鏡獨知一任
旁人驚墮馬鬢蟬高攏不隨時

眉

淡淡春愁傍額生遠山斜映夕陽明鳥分新樣螺添翠蛾
掩雙鈎粉鬪輕時笑時顰如有語爲雲爲月總多情風流

枉說張京兆禿盡千毫畫不成

目

夢回羅帳手頻搓奈此匆匆一顧何枉把塵顏照秋水慣
從春晝撇驚波眉峯乍蹙精神湧心語潛通盼睐多剛道
避嫌須正視捲簾相送快如梭

脣

新櫻一點逼人紅問字時依硯匣東乍解含毫沾剩墨曾
因倦繡唾殘絨吟成謝絮聲聲媚譜就秦簫曲曲工怪得
無言猶有笑芳蘭吹出不關風

肩

尺六量來骨相殊
畫工休道美人無
垂時盡訝身如削
拍處私憐體似酥
梅塢月斜郎並倚
葯階春晚婢爭扶
曉來親爲披雲葉
嬈嬈輕軀妬綠珠

手

芳心捧處不知巡
玉筍香搖翠袖春
但得摩挲皆俊物
全憑指爪識佳人
撥成綵縷絲條膩
裁就輕羅熨貼勻
除却織縑兼織素
技釵曾濟酒狂貧

腰

似曾相識楚宮旁
又見佳人立北方
轉仗輕盈驕趙女
敢緣清減妬崔娘
一圍生琢崑山玉
半折低垂汴水楊
願作錦裙朝夕繫
衆中猶得護溫香

足

掌上擎來影亦妍
藕花裙畔態蹁躑
凌波冷印彎彎月
貼地春生步步蓮
場裊香塵喧蹴鞠
院飛紅雨試鞦韆
深情欲借鞦尖送
悄立徐陵筆架邊

春鶯

歸盡南鴻節漸移
金衣公子弄新姿
暖風亭榭橫琴後
斜

日溪橋載酒時花夢呌殘香漠漠柳魂啼斷翠絲絲上林
有樹容全借振羽先棲第一枝

春燕

萬井樓臺一笛風雙雙掉尾出簾櫳柳邊掠絮輕裁綠花
下穿枝迭剪紅鴛枕夢迴粧閣午杏梁香落畫堂空呢喃
莫把殷勤訴穩結幽棲老此中

春花

曲江春動柳成衙綠襯枝頭灼灼花烟鎖玉山橫碎錦雨
蒸金谷散明霞醺醺酒嚴才人宅芍藥羹濃宰相家蝴蝶
作團鶯作陣臨風莫放日西斜

春草

細雨才晴綠到門梅花村接楝花村翠分湖墅搖波影青
擁河橋染露痕南浦賦成人漸遠西堂夢醒月猶存秋來
倍足牽離緒簾捲東風枉斷魂

春山

春山如笑亦如粧消盡輕嵐翠滿床紅杏樓高延暮景綠
楊堤迥墮朝光泉蒸別澗雲霞潤風落層崖草木香同一
冷烟殘雪路杖前添放野花芳

春水

東風吹柳拂長堤堤下清波盡向西雷動易成龍變化雨
餘難辨鷺高低螭頭舫自匆匆過雁齒橋仍宛宛齊恐是
仙源花正發碎紅流滿武陵溪

春風

聲滿乾坤看却無破萌舒甲費工夫雲開坐見三陽轉雨
霽能催萬物蘇簷散餘花驚玉馬臺浮寶露暖銅烏寒鴉
也仗吹噓力飛上晴天學鳳雛

春月

積水溶溶藻荇交春光一夜滿林坳蟾無魄向水壺濯花
有香從玉宇拋暫放餘輝浮草際愛留清影伴梅梢照人
容易生和悅露濕中庭鼓數敲

春月令人和悅
坡公夫人語也

春雲

書來已自兆豐年車蓋亭亭穀雨前龍起未容藏暗谷風
吹常使近晴天葑階晝靜陰原薄桃塢宵寒影獨偏臚唱
聲中呈五色白衣新惹玉爐烟

春雨

尚有餘寒似早秋墊巾人遠易生愁晴催花蕊紅爭滴輕

酒楊枝翠欲流綺陌雲濃沉燕羽瑣窻風細漉鶯喉此中
大足叅元化漢水平橋綠滿樓

春雷

曉來風雨徧春城倚柱遙聞出地聲燒尾易催青鯉躍破
山難免蟄龍驚發揚天意期無悶震惕人心感不平特付
威權歸長子百花香處鼓爭鳴

春露

鶯囀紅樓尙未晞瀼瀼已自遍郊圻騰文暖沁仙人掌結
潤濃侵孺子衣降自花前香並濕沾從草際綠添肥登臺
一望清難掩萬里晴光媚曉暉

蒼山積雪得巖字應學使蕭碧畦先生教

此與下四題俱係彙考經古者公謂諸生中並無
佳卷值場日授簡面索予素不工試帖走筆塞白
存之以記一時之興

點蒼山亦稱中嶽積雪年年白滿巖消盡風烟神皎皎照
殘蒙段影巉巉瓊霄日麗懸珠瀑貝闕雲開擁玉函渲染
林巒隨地布勾填峯嶺帶霜嵌堆從極頂無心化賣向炎
天着意剗碎粉叢深迷鶴鶴爛銀光散走磨麈十樓寒映

金華山樵言內集
花千樹三島輝流月半帆滿貯瑤華雄佛國清標不受兩
關緘

桃花雨得春字

芳園雨過淨無塵催出天南二月春都向公門沾潤澤各
含生意露精神溪雲暖漾新翻錦烟水深迷獨往人幾度
曲江池上望晴光一片悵佳晨

荷花風得荷字

風前不唱采蓮歌坐覺新涼出翠荷紅菡萏開疎雨歇紫
芙蕖颭夕陽多披來儼畫香爲界吹去疑翻錦作波閒倚

水亭消受慣一恣明月影婆娑

菊花霜得秋字

夜氣清嚴暑盡收頻催落葉下高樓黃花晚著三冬節青
女橫陳一徑秋滴向疎枝雲共冷鍊來做骨月同幽後彫
尙有松兼柏鼎足霜天作蹇修

梅花雪得香字

東風一夜凍銀塘開到梅花雪亦香春動轉疑水清淺寒
多未碍月昏黃廣平賦在心原冷和靖園空路易荒采得
瑤華向處寄南枝不抵北枝良

秋雲似羅顏惺甫先生課題

新霽軒窓曉色橫秋雲片片眼中生鮮疑玉女刀裁就巧
似天孫手織成珠露滴時尤掩冉綺霞交處獨分明飄來
早具從龍勢叠去初含出岫情別有元黃司匠作絕無機
杼見經營臨風綵繚芙蓉渚映水紛綸橘柚城越素吳紈
差足儼鮫綃霧縠總難名披帷暗度驚鴻影隔幔遙聞唳
鶴聲長短都能連一氣卷舒原許近三清潛蒸密雨絲同
散斜覆疎林錦共頰霍顯綾多張已盡胡威絹少熨初平
授衣節屆容裘絮遍錫寒閭起凍氓

賦得洗金以鹽得鹽字七言八韻

品殊貴賤本無嫌誰信精金亦受砭揀向沙中常見寶洗
從鑪畔獨資鹽在鎔已覺光難掩受範還看色倍暹旨叶
熬波非就濕功歸潤下豈趨炎滓渣消處酸醎合性體真
時板濯巖膽可分杯空數獺肪能軟王漫誇蟾濃漂素影
沉沉碧闌撮霜花細細添錦亦需魚灰浣布三薰三沐喜
同沾

賦得調水符得符字七言八韻

手割霜筠色不渝分藏免致雜潢汗信同操券工防水律

等傳郵巧合符爲惜泉甘行我法肯教人誤入他途依稀
似報占風鐸宛轉疑探紀事珠遞去無須嫌瑣碎將來每
自笑沾濡捧盈僧慣臨溪立持節胥還挈甕趨車可指南
懷卉服箭堪司漏滴銀壺清心妙理誰能識雅節千秋仰
大蘇

賦得深屋喜爐温得温字七言十二韻

消盡冰痕與雪痕潭潭老屋酒盈罇爐虛旋撥通紅火灰
活全留隔夜温焰簇銀荷浮藻井香生瑞獸靄蘭門傳薪
未礙光微歛借箸還欣性獨存拍手容吟撒鹽句舒眉勝

沐賜貂恩梅花月貯三更帳榭葉烟橫十里村挾纒徒教
懷霸王解衣何遽感王孫玉能暖老空相憶木號長方信
有根那用臨窻邀夕照無須曝背趨朝暎詩人夢許重余
戀良友心宜對榻論佳趣得時膚自澤北風吹處氣先吞
肉屏半撤簾低放笑煞田家楫楸盆

賦得農及雪澤得春字七言八韻

寒氣纔疎暖氣親東風應律及芳辰消來歲杪三番白釀
出田間一片春耜已留良聲曼曼甸原纘禹勢响响乘時
望叶爲魚夢終畝歡騰叱犢人玉液浮烟朝拆凍瓊腴映

日午生塵鬆疑過雨耕耨易賦等融脂壟陌新或下或高
隨所事如酥如沐活斯民西疇此後無堅土綠潤紅酣樂
意真

賦得刻木為耕夫得夫字七言八韻

畫形何必果公輸民事勞心費撫摹脫手誰題木居士傳
神如對上農夫雕搜詎肯遺簞笠瞻望還疑及杏蒲桑柘
日暄呼欲起粉榆烟散醉堪扶力田未礙鬚眉古在野終
憐面目粗漢帝曾鎔金作佛晉僧空聚石為徒胼胝狀可
深宮得風雨情隨蔀屋俱定有餉童兼饁婦參差添人太

平圖

賦得水舵得水字七言八韻

坐同天上興須乘觸目光搖片片水尚覺寒流千尺湧還
看爽氣一河凝負而趨者神原暇縱所如今勢可憑險異
江湖容泛泛利通舟楫獨兢兢履霜早識唐人慣盪槩空
傳越女能路入銀潢槎並到浪消瓊海岸先登問津誰信
真來此照影終疑得未曾不必牙檣牽錦纜時橫野渡喚
隨磨

賦得卮言日出得卮字七言八韻

天倪自動匪矜奇挹彼何勞更注滋言既有倫寧計日出
因無當等浮卮粲花論發層層艷翻水文成故故遲旨遠
終留精液在機靈早使粕糟遺尋源未許瓶同挈觸境還
隨噐共歆分徹中邊無可礙味包內外總堪思千番妙入
雕龍口萬孔神周瀉地時傳得玉杯繁露學如河如漢復
誰期

賦得雪意得成字七言八韻

同雲布出景偏清玉戲天公局已成釀自空中看有色包
猶象外聽無聲烟凝紫塞千山靜木落寒溪四野平水氣
纔從衾際潑冰痕忽向硯邊生潛催朔雁羣羣下細入江
梅樹樹橫樓迥易教詩動興風嚴漸覺酒多情層霄瑞宵
調三白客夜光疑照五更雪意由來非雨意任他等伴或
羞明

雅弗喜應制詩除春秋闈既歲科試外三十年落紙寥
寥丁巳冬由晉如燕借榻西阿檢討寓舍適與申浦侍
讀結消寒課強予入會予以儼驅之身方日走冰雪中
何暇作此生活然重違高誼覲顏塞責庶下賃春婦使
習纂組率爾成章終嫌不類存之聊記一時之興其曰

附課志愧也曰消寒附課志所從起也識者鑒之範記

賦得象環五寸得謙字五言八韻

直隸督學沈雲椒先生觀風代作

風詩歌象齒制器象能兼較寸形惟五如環德應謙光搖
雲母珮色映水晶奩未礙揮斤切無須壘黍添名高天下
白道叶邑中黔玉潤原堪比金寒未足嫌內虛心獨朗外
惠口宜箱漫作模稜認踈狂實所砭

其二

自有循環理名微義獨嚴論形傳五寸比德許鳴謙較拂
容偏雅如盤體更廉乍符蒲璧潤寧類赤刀鋸空洞原無
物方隅未足兼用能參玉導色已奪牙籤一貫端難竟三
緘緒可拈韋絃俱入佩觸處得箴砭

賦得深巷明朝賣杏花得聲字五言八韻

屈指明朝事關心隔巷聲杏花千樹發春雨此宵清破曉
紅爭潤臨街艷獨橫折來憐玉軟拈去覺雲輕疎密枝相
間低昂價自平依人嬌弄影着手細含英碎錦坊前路瓊
林宴裏情夢回香撲鼻一笑有詩成

豆腐三十韻

我老無偏嗜憑誰炫食單偶拈豆棚話聊勸腐儒餐嫩覺

操刀易鮮愁下箸難性常存淡泊味任入醎酸汲水分甜

苦傳方究委端磨因元凱轉杜預始作磨瓢倩許由搏着手飛

靈液添薪沸錦湍氣蒸花鬪雪質化滷成丹渣滓消全淨

淘融德匪刊濃原勝酪乳滑豈逸牢丸遠隔櫻桃宴甘陪

苜蓿盤烹須調醬沃淪每斷葱攢雪沍休防凍灰封弗厭

乾白疑崑玉片便等聚香團骨董羹堪配青精飯共啣齒

空隨肺決鍊不爲魚鱠牛廢羲之炙猪閒閔氏肝肯偕元

酒薦容占菜園寬茹素王摩詰清齋釋道安雉膏羞比潔

和璞敢求完粽只天中解餉當雨後殘擘蓮嫌粉膩壓蕨

愧漿寒世果饕殮備吾寧口腹殫飽知逾半菽議恥附鍾

瓠藜藿能相濟肥腥可盡拚張蒼逢獨喜時戢買猶歡竟

體都離垢何人忍索癥縱遲登孔席已合貯顏篔製或從

荒肆名仍隸大官淮南留妙品莫與肉同看

角黍得江字五言十六韻

餽節忙于歲紛紛食物扛一盤堆角黍千古憶湘江品合

村巫賽絲纏水族降人爭沿楚俗名已重南邦繫縷時聯

五登筵必疊雙甜思糖作餈紅愛棗填腔寒具油難浣湯

元體易厖圭稜知盡露麥稷免相撻蒲葉香侵座榴花艷

滿窓解包頤欲朶辨味語休吃着手黏成玉經宵色不黧
遠投劉裕席頻佐范雲缸米價隨風長憂心似水淙何顏
還大嚼無計退驚瀧峭訝林剗筍青殊豆摘豉庾家傳美
號舉箸足音登

序

文章無天趣雖工不足貴惟率性而爲則天機所到不可
湊泊其意境新其風骨峭其筆幽折俊異動與神會此性
情之故人莫能窺也 師荔扉先生詩爲一時宗匠海
內知名者讀金華山樵前後集實有觀止之歎乃見 令
嗣鴻洲天愚集而蹊徑別焉茲讀 令弟大樹山堂集而
風趣又別焉雖不能如先生而各有領會無絲毫相襲不
相襲乃不相掩矣五古秀潔古淡得韋柳筆妙七古跳脫
在高常侍元漫叟之間五律亦不失爲唐調一門之彥愈

出愈奇乃至於此閒嘗觀崇巖巨壑江河浩汗則驚爲殊
絕及至覽幽曲之境苔痕草色澗水潑激砂分石漏又覺
神爲之遠李謫仙詩云別有天地非人間然則此詩之天
趣獨全殆非人籟之所能參矣

嘉慶甲子春三月滁陽弟張葆光竹軒氏拜手撰

大樹山堂詩鈔

雜詩

趙州師 箴法言

有鳥雲外來集我池邊樹厥態狂于鴟揮之殊不懼中林
風蕭條孤鶴知何處

人生大塊內百年如一時有酒且須酌胡乃戚戚爲芬芳
能幾何霜露復相催

窮達寄宇宙各各皆有營笑我放曠身悠悠竟何成卽事
苦迂拙撫已愧平生知士窮于才愚者墮其名且復出門

去遠山終日青

爲山意在高鑿井意在深豪華競徵逐泊然貧士心貧士
甘寂寞一言輕千金元豹處深霧好鳥鳴幽林
涉世豈真淺吾自全吾真息心對止水過眼如浮雲嘯傲
林泉下有友輒論文俯仰苟不愧毀譽由斯人

夜歸

暝色動平川風雨此時歇余自渡口還正見東峰月忽聞
犬吠聲山村露林缺

得家荔扉三兄書有懷

相別八年久喜見音書來君思青螺山我憶黃金臺意深
語難罄道遠思無涯何時置尊酒花下共徘徊

陽瓜城南晚眺

信步出城南遙望烟飛處落木生涼風攜筇遵廣路悵望
佳人居長吟天欲暮淡淡流雲陰翩翩飛鳥去未得攜琴
過獨立有餘慕

信步

閒居無所爲信步入山去雨歇亂雲飛石款流水在數里
絕人烟蕪蘿挂枯樹欲採中林蘭香來自何處

訪友人
山風吹荷衣行行日將暮
一徑林壑深雙崦茅茨露流泉
響入雲幽鳥時歸樹客至罷
瑤琴攜手話情愫谷靜聞空
香談深見真趣問從何方來
遙指雲生處

寄省三

僦僦忘年友乘暇時相過
居山山自幽白雲宿庭柯耐寒
愛松栢手植森巖阿每當灌
園歇松風和吟哦

雨後漫成

風來樹雲飛雨霽山月上
翠竹涵虛清飄飄絕塵埃彼美
高陽徒古來稱放浪富貴憂
患多山林性情曠神仙安可
得真心斷虛妄

答山中人

居山願山深山深愈清寂
吟嘯匪近情往來無凡客月
下聞松濤閒中辨雲色有時
采藥遊無人識行跡

送別

送別登高山別後情未已
寸心不能言相望萬餘里來
歸期何時腸中百憂起淒清
關山月浩渺江湖水春華能
幾時離懷自茲始

遊春

春色在邱壑獨遊豁我性
風來花氣幽雨過山光靜
危橋履欹石樵水侵巖徑
巖轉雜花明山村逢罨映

春日郊行

綠埜遠無際行行幽興生
臨溪玩春水淡然移我情
天桃映竹媚白鷺過浦明
山翠有無間天際雨已晴

晚眺

步出村南岡鳥還日欲暮
巖巒將出雲蒼翠霏成霧
樹密晚烟生澗陡飛泉注
徑僻不見人長歌自來去

暮

出門日墮嶺入門月掛山
閒雲抱樹宿孤鶴先人還
良友如期來携琴爲我彈
高山懷峩峩流水爲潺潺

山村雨後

雨洗窻中山雲連江上樹
比戶散炊烟方知天欲暮
怪石響飛泉樵夫歸隘路
邱巒畫不成相對勉成句

客至

有客平原來過我山堂話
坐久起茶烟清風驅暑快
連日雨不休今朝晴可愛
萬里杳無雲鵲噪深林內

睡起

睡起日下窓炊烟颺茅舍暑隨驟雨過雲護層巒下岫幌
不逢人澗戶偏宜夏新荷向日妍細竹當風亞有酒姑酌
之適性百憂罷

陰雨

十日雨不止江水漲平地但見遠人村出沒波濤內米缺
久斷炊禾盡還憂稅念之意愴悽有酒難成醉

夜歸西山

日夕出城市月皎歸空山林表霜氣深風來葉聲乾澗陡
石激水隔嶺聲淙潺巖扉犬迎吠燈影踈籬間

書久不至有懷家兄荔扉

君去日復日相思隨日深寒暑眼中易悠悠勞我心鴻鴈
久不至蟋蟀空堂唵翹首望盧龍萬里秋雲陰

秋曉

曉來秋意深雲陰不成雨荷風拂面來香散知何所出門
江水流空林響人語蘆碕飛炊烟山頭日初吐

寄簪巖

自君天水去余獨掩柴荆出遊若無依遠峰徒青青停雲

如有意
蕭蕭散復生
古人詠三秋
方之有餘情
矯首望天際
太息飛鴻鳴

秋懷

雁從北地來
使我生遠愁
不見故人書
中心常悠悠
仰登高山岑
俯見長河流
長河流不息
相思無時休

晚歸

日落西山西
四野生涼吹
蕭颯望中林
黃葉散平地
稻熟人滿田
已有賓鴻至

晚眺有懷

野烟如輕雲
漸覺山閣迷
林疎帶落暉
黃葉乘風飛
清流通前村
徒倚隨所之
遠天賓鴻至
老樹歸鴉啼
崖巒爽氣高
撫景懷所思
所思在京華
道遠不能來
孤吟對暝色
徘徊將何爲

秋園漫興

秋日杏花开
盆梅亦舒萼
人柳尚青青
媚我雲中閣
滇南古佛國
時物殊京洛
霜雪天地心
於茲似不著
風景娛人心
斗酒相娛樂

簪巖有事州城幾
半載矣歸來卽過山堂見訪爲詩

以贈

佳人久不見乃寓山北岑
天水波濤多涼飈吹衣襟
處世慕吾子爽氣何蕭森
訪我山中居撫我韻泉琴
曲罷窻月高翠竹生繁陰

村居

久不入城市山林容我狂
或登高峯頂或步毘江傍
古人不復見來者安可望
仰觀天地間風雲何蒼茫
爲樂貴及時胡爲懷感傷
此生無榮辱一飲須千觴

雨後晚眺

木落崖氣枯雨寒冬日短
蕭蕭勁風來雲開山自遠
斜陽欲西墮林間飛鳥返
徑僻少行人昏烟漠然晚

隨意二首

隨意出柴門夕陽在高嶺
人間覺山深林逸知風靜
籬落隔村墟曖曖孤烟冷
風物畫難成相對惟自領
隆冬雪意深薄陰天色暝
雨歇風始寒月生夜逾靜
野鶴發清聲庭梅散疎影
好友携尊來徘徊情自迥

望遠曲

望君登高樓樓高山更遠
但見烟與雲裊裊聚復散

病起

臥病不入園梅花開且落空香入帷簾知負窓前約抱琴
客不來隱几對崖壑

述懷

親老宦京華仲兄常侍側關河萬里間雲樹千重隔不見
音書來寤寐長相憶蕭蕭松林風粼粼江心石攬衣起踟
躇欲徃竟安適

和龔大簪巖題畫魚原韻

畫工畫魚不畫水自有波濤趨筆底雙腮呀呷如有聲展
卷乍疑猶掉尾大魚上騰萍藻分揚鬣鼓鬣爲鯨吞其中
一二類難辨紛紛游泳皆有神簪巖一見大得意詩才豪
縱詩律細淋漓揮霍風雨驚庸手于茲惟引避此畫此詩
雙奇絕能令虛壁終日生秋氣時無摩詰與杜陵兩君今
已得其勢引子朝天圖所記龍門燒尾雷電至

短歌行

會良友置美酒一飲應須三百杯人生窮達復何有吾身
非金石豈能長不朽少壯幾何成白首君不見漢武與秦
皇求仙本欲繁華久驪山茂陵莫復道阿房長樂今在否

放歌行

天雨降爲水各自入江河人生如露寄草木相逢不醉欲
如何窮達亦有命何堪戚戚憂愁多君不見王侯將相競
榮顯亦同貧賤歸山阿

呈簪巖

簪巖意氣超凡流新詩酷學韋蘇州興來亦復弄繪畫山
水人物窮雕搜徃徃過從出相示令我叫絕消煩憂吾兄
荔屏燕臺客豪情亦復擅筆墨秋月春花幾度更夢裏時
時見顏色安得歸來協唱酬更覺騷壇不岑寂我幸與君

結比隣十年不改舊情親翻手爲雲覆手雨笑爾悠悠世
上人

寄三兄荔屏

長安十見三春花計程遠隔八千里書來言歸竟未歸日
日登樓意無已不聞漢時姜長公弟兄同被樂融融我獨
相思不相見天南地北如飛鴻洒掃山齋待君至故園樂
事原無窮

秋雨行

朝欲雨暮欲雨四月五月雨勢多欲雨不雨農人苦以車

九日山堂詩金
九
汲水水如髮汲到田間天正午日烈日烈土乾水氣微大田龜
坼少禾黍六月七月雨少通高者荒蕪十有五及此秋來
收刈時朝雨暮雨何淋漓一雨十日或五日陰多晴少金
颺吹濁浪滔滔江水漲平地出水迷東菑登高不盡蕭條
意四野嗷嗷鴻雁飛

晚過紫雲寺懷竹林先生

竹林先生性愛竹結廬毘江秋水曲夕含蒼靄朝含烟千
竿萬竿翠可掬雨霽不知山月升風來便覺秋意足把卷
沉吟坐此間宛爾佳人在空谷當年下榻紫雲中騷人韻

士長相從我時總角客昆海雲龍未得追其蹤前年移居
過雪蕉詩篇字字追風騷春風化雨意不盡蕉陰雪影滿
庭但覺天機饒誰知歲月殊草草離日偏多會偏少二年
作客鄣闌城一朝匹馬燕山道雪蕉翠竹兩依然不見先
生心悄悄昨日書來言別久粵東分試君恩厚訟庭草
長碧雲深此地古今聚才藝前有昌黎後眉山流風善政
垂不朽先生直欲法二公誰謂循良不常有歲暮裁箋欲
寄書羅浮試問梅開否

元日山堂漫興

戶戶曉光新三元屆此辰初陽紅出岫嫩柳綠親人濁酒
原堪醉幽居豈厭貧椒花兼栢葉容易卽逢春

春晝

曠達成余性幽閑見物情日高春睡起地僻野涼生水竹
連村淨風花過眼明幾回簷畔立林外正啼鶯

鼓琴

獨坐理瑤琴潛生世外心烟消春日永樹密草堂深中散
自千古廣陵誰嗣音曲終餘雅意倚柱發高吟

登樓

幽意忽不愜登樓倦眼開風從天末起聲自樹中來山遠
微生翠愁多怯舉杯暮雲時作雨未必是陽臺

晚眺偶成

茆結巖幽處泉流竹塢間生雲意外樹落日案前山乍覺
林烟暗時看野鶴還落花芳草內門設亦常關

喜晴

添漲連朝雨癡雲喜乍收捲簾看霽色把卷倚危樓天入
遙山翠人依碧水幽斜陽西嶺出遠樹野烟稠

秋夜不寐

天寒人不寐屢問夜何如月已沉西候雞方報曉初秋聲
喧古木落葉滿前除撫景生愁思寒砧况未疎

中秋對月

月上山樓靜憑欄積水橫一年秋已半此夜興偏清夢落
盧龍塞風傳白雁聲陰晴知未異兩地各含情

閨思

皎皎深閨月流光怨獨看秋來戍人遠天末寄衣難霜葉
空林滿金風小閣寒倚闌腸欲斷夢落塞雲端

九日懷家兒荔扉

不敢登高望雲山萬里賒心常牽薊北夢早到京華極目
吟楓葉消愁醉菊花遙知羈旅况此日倍思家

秋夜

霜風秋颯颯野柝夜沉沉明月乍圓缺寒燈無古今誰遺
青玉案兼惠碧雲吟偶念荒村外開門落葉深

村居

雲連江樹碧山接草堂青自得田園樂渾忘物我形抱琴
看舞鶴攜酒過閒亭林竹階除滿風來戶自扃

古劍

塵土埋藏不計年
霜苔皮老認龍泉
頗多紫氣時冲斗
豈必虹光自倚天
千里無留行似水
三王莫辨墓埋烟
太平何用鋒芒利
尙想功名百戰前

太王廟卽目

探幽千仞陟嵯峨
極目長天倦鳥過
晚翠濕衣微雨歇
夕陽滿眼亂峰多
孤村近水皆楊柳
古寺藏烟自薜蘿
嘯傲不嫌歸路遠
白雲深處聽樵歌

秋山

秋來山色暮尤佳
半掩蒼烟半落霞
正是層樓新雨歇
時看千嶂夕陽斜
丹崖老樹凋霜葉
深谷幽蘭放晚花
靜對捲簾初月上
峰螺青處有人家

山居漫成

山居鹿豕許同遊
佳景無邊一望收
樹密祇因村舍僻
鷄鳴倍覺草堂幽
泉流絕壁渾疑雨
風過疎松總似秋
嘯傲偏宜新月上
白雲深處衆峰稠

秋晴

蒼茫烟樹盡朝暉
萬里晴光入座微
楓柏經霜催葉落
荻蘆承露著花肥
天高塞雁斜成字
風靜秋雲不作衣
石燕

已還農望憫家家收得稻梁歸

秋日閒居

西風颯颯雁鴻鳴落葉空階雨乍晴
饒有琴尊消俗慮雅多竹石寄幽情
江流遶郭秋烟淨山色當窻晚翠橫
似此閒居無一事薰爐茗椀足生平

和簪巖中秋夜過山堂元韻

良宵月上景偏幽酒浪盈盈正滿甌
萬里清光橫遠岫滿天寒氣入高樓
蕭蕭風竹三更後唧唧吟蛩四壁秋
好友不來來又去懷人詩思繞滄洲

江村卽事

涼風蕭瑟又逢秋落葉紛紛逐水流
抱石江雲迷野岸隔林山雨過高樓
雁鴻聲到情偏遠蘆荻花開夢亦幽
遙望伊人在何處關河萬里不勝愁

月夜村居

風迴碧水浪如鱗畫裏樓臺絕點塵
雨後青山俱到眼夜深涼月倍親人
花陰露重思移榻樹裏燈明識問津
坐久不知更漏永誰家簫管調翻新

小酌

琴瑟西風入草堂
飄飄巖桂散天香
滿林落葉山窻下
一道飛泉竹塢傍
籬菊經霜饒雅意
木蓮着露有餘芳
偏宜皓月相臨候
更與幽人共此觴

九日登高

千崖秋氣上衣來
更有何人共舉杯
芳草已知隨夢遠
菊花空自伴籬開
百年風物重陽節
一代英雄戲馬臺
我亦登高攜綠酒
松聲颯颯吼晴雷

村居晚望

蒼茫日落禮江西
秋色醺人眼欲迷
野水去隨幽徑遠
山雲高與畫樓齊
脩巖路曲牛羊下
別墅林深鳥雀啼
月挂長天涼雨後
蕭蕭黃葉板橋低

秋夜獨坐

蘆荻橫江萬頃秋
西風蕭瑟不勝愁
疎砧欲歇月侵榻
斷雁初鳴人倚樓
草閣霜深烟漠漠
楓林葉落竹脩脩
金爐香燼更闌候
到眼寒光入夢幽

山堂夜坐

幽栖澗谷遠紛靡
天氣新晴擁夜缸
野笛暗隨風入座
山雲遙與月當窻
芙蓉開盡秋霜冷
橘柚香來澗水涼
眼底

烟霞收不盡長空雁影各成雙

冬夜

千崖木落竹森森江水環門草閣深
雪意欲飛風栗冽梅花將放月晴陰
尊空懶酌淵明酒調古誰傳叔夜琴
漏永燈殘人獨坐青松同結歲寒心

歲暮村居漫成

歲暮幽栖赤水濱天空海濶一閒人
拋書便與黃農近畏病翻於藥餌親
貴客不來緣性懶市氛久絕任家貧
泉流石上琴聲靜風月知余樂是真

詩鈔終

鴻洲天恩集序

滇禹貢之梁州其產璆錢銀鏤亦數發爲瑰瑋奇傑之士
師君立夫負雋才其家尊荔扉先生允滇之老宿予以
癸亥春昭先生於皖時立夫已賦玉樓而先生朝天集
後附立夫詩數十章有詠蒼山上西嶺登露井樓諸篇天
才卓拔氣識雄奇知機杼一家先生有不凡子矣迺生
不以大科鳴文昭武烈有所建白而疫癘潛遘冥然長辭
多長吉之一歲少陳思之二齡宜先生之撫卷涕洟悲
其遇也夫殤子而壽彭鏗而夭壽以神不壽以形立夫雖

無偉業豐功可壽於世而茂陵遺艸其精魄亦不死矣惟
上有西河之戚下貽嫁娶之憂摘藻仙才餘恨鬼錄其數
之窮不能不搔首問天耳嘉慶甲子春正少白弟李琪拜
題

亡兒道南剩稿序

往閱曝書亭集鍾翁遺稿至箐園漁笛諸遺詩蓋嘗歎竹
垞堯峯兩先生所遭之苦而並惜伯子與昆田之未盡其
才也亡兒道南年逾二十溘然以逝較汪朱爲尤速夫西
河喪明惑矣然與卿似有瓜葛則又何說焉過情非以保
身不及情亦非所以訓俗予惟委心任化安之已耳道南
之生也爲長孫體素清羸先父母極爲鍾愛雖勉令就
塾時作時輟辛亥余攝太和學篆論令來署旋携往劍川
課以制藝伸紙數百言或千言毫無場屋矩式少持之轉

生厭薄而性獨好詩搖膝支頤能癖乃翁之所癖間肆於
琴酒巖爲呵叱不日狂態復萌友朋中爭誦其詩予亦心
喜之故不置一辭尤冀其以攻詩者移而攻文庶邀微名
借博 堂上懼是時雲壑殿撰碧畦檢討先後督滇學皆
善予查號輒詢其卷余以未能應試對碧畦先生曰吾輩
子弟寧至大不通人洋後心境一開便有進境余述此語
且促之執意不出甘以頑鈍請窺其意若不肯以聲氣青
其衿者 先大人聞之亦喜遂以授宰遣還里門並令侍
先父母起居乙卯予引

見北上叠遺閔丙己未秋始歸於修祠治墓之暇索其詩
已厚二寸許偶爲點定推敲至是已於帖括無望矣將入
都之前數日卽其成句者命僕人摘錄一冊乃抵省未一
月竟以疫疾隨婦殉其母死於家老淚橫流不忍取視笏
岩師見之極爲贊賞而滁州張竹軒尤其醉心壬戌夏皖
桐鐵禪氏錄而手校之以付刊於朝天集選人後集之末
嗚呼予以薄祜之身奔馳南北 先父母大變眎含斂啟
手足道南以孫代子能補余所不及余之罪得以少寬卽
令其目不知書余方感且愧之况是詹詹者孤冷之中具

有性情

大人君子倘加採擇天以人者壽以詩斯又不幸中之幸
矣獨惜余宦海飄蓬顧影生悲未審席兒廕兒亦能如其
父克終其祖之事焉否也撫卷捉筆不禁泣然

嘉慶壬戌中元後一日二餘堂老人師範手書於雷池官
署之江山一覽樓

江沙子思集序

流聞象賢繼世永紹箕裘今子克家常緇弓治是以鶴有
在陰之和蟻傳時術之勤 立夫大兄吾

荔扉夫子之家嗣也方生而玉燕投懷稍長而芳蘭竟體
賈逵尚幼籬邊誦讀偁知白傳能文簡上之無便識媿薛
家之鳳駕乎三焉擬荀氏之龍此其一也况復祖武鍾情
孫謀係念信明德之將昌異遠人之繼起嫻茲夙慧早諳
孔子家禽具此寧馨不比王門野鶩庚信濟肩吾之美謝
肅嗣希逸之徽無如白祥兆骨赤疫流氛炊白占肉鼓盆

抱恨慈孫安在徒含烏烏之情孤子偕亡竟隕塊苦之命
天道寧論人倫至變謝階之玉樹長埋馬殿之蘭芽早刈
太元經就竟失烏童少陵詩成難留驥子遂使西河隕涕
徒增離索之悲莫云東郭忘情不廢嘯歌之樂若此者未
必非天之所以厄文人命之所以窮君子也然而玉樓雖
赴古錦猶存臨水登山不乏嘔心之句吟風弄月偏多得
意之詞恥同陶氏之宣紙偏不好堪擬顏家之浚筆已能
傳雖促節之堪悲幸立言之未朽珠光耀日寧藏合浦之
流劍氣衝天豈閉豐城之獄山是搜其殘篋揀厥遺篇尚
思剗劖類加不比人琴俱逝九原不作當年曷勝請梓之
悲一綫曾留此日堪續傳燈之錄彪跡睽異地誼切通家
慕素質之非凡悼鴻才之未就故敢詳其本末叙厥源流
石麟不見應知開府傷心金鹿長乖雅識河陽抱慟所幸
者雙珠競秀合璧連輝雖寄養于外家終嗣音于中翰遙
遙梓子徒興零落之嗟萃萃桐孫堪致離階之集則見天
上之彩雲不勝山前之怪雨也哉

嘉慶甲子春三月之旬有五日望江世愚弟龍彪拜撰

鴻洲天恩集序

立夫師君仲公華胄滇國仙姿本家學之淵源一門傑出
 任天真之爛漫七步成吟望著龍文紹貽謀而變化名高
 駒血負俊氣以飛騰夫何玉樹長埋文星早墜遂使歐公
 塵榻空闕遺編子敬人琴竟成慘調然而沈何陶謝千秋
 標入室之稱盧駱王楊百世擅升堂之目言能不朽數豈
 拘乎壽夭死或如生各自垂于今古濤驅雲湧嘆韓子之
 雄才玉白花紅弔文山之絕艷凡屬錦囊之句都成寶劍
 之篇况以英雋之妙年已號風騷之巨手神馳天馬欲羈

勒以何從筆吐江花并推敲之不事勝崔氏以鴛鴦得號
陋謝家以蝴蝶爭名蘇海韓潮染翰則倒流三峽班香宋
艷摘芳則辟易千人對客揮毫似孔璋之倚馬隨時起興
比禹錫之探驪以故古佛菴前詞驚怪石滿賢林下氣肅
詩魂岸碧天明繞郭上西河之觀路盤山立停驟眺露井
之樓村度雞鳴日映千竿翠竹寺遊鶴頂風生萬壑秋聲
以及燕至梅開俱增佳興山居野望並觸高懷莫不口吻
生花動如彈丸脫手較之剪紅刻翠讓此豪雄衡以鏤玉
雕瓊遜茲俊逸掃六朝之綺靡遠駕齊梁吐萬丈之光芒
鸚鵡是為序

上追李杜君才如此何疑館主其蓉後起有人許見詞高
嘉慶九年季春月穀雨後二日世愚弟魯啓大拜撰

鴻洲天愚集

蒼山

趙州 師道南 立夫

滇山無不竒蒼山竒稱最飛來鬼國間長作蜿蜒勢雄吞
百二關翠護三千寺縹緲十九峯一峯一天地更有十八
溪一溪一龍治青天無片雲忽見雨珠怪長夏暑不生時
有雪花墜影倒入洱河蛟螭駭俱避我本好山人恨未峯
峯至何年身得暇蠟屐窮其際遂作山中樵日與神仙醉

秋夕撫琴

暝色已漸深竹間聞露滴琴韻得秋清秋心與琴適曲盡
夜未央孤月生林隙

海虹橋晚眺

疎疎春雨浥輕塵晚景依稀野渡濱嫩柳綠遮臨水寺遠
山青逐過橋人花邊艇子鳴榔去鏡裡漁翁入畫新倚徧
石欄詩未就一痕新月淨如銀

白梅

一樹非冰雪橫窗已覺寒無春開忽滿有月見偏難並瘦
真宜我同閒每忘餐清吟當畫靜影在墨池端

春曉作

曉來深竹淡烟浮桂宇村村喚未休定是昨宵山雨過門
前溪水帶花流

楊花

楊柳絲絲綠乍肥楊花漠漠送春歸當風望去愁同遠欲
雨飛來力漸微簾外欲迷巢燕路水邊頻點釣人衣漫天
搖蕩成何事勸爾爲萍暫息機

山居吟

山人不出山故得山居樂有詩對山吟有酒對山酌或訪

洪洲子思集
山中僧或采山中藥山虛雲慣來室靜塵不著長日枕書
眠滿榻松風掠

贈止崖鍊師

老子鬚眉孺子顏逢予自謂不知年水庭經展龍皆伏花
巷雲來犬亦仙戲寫時人爲畫看鍊將竒句作丹傳餐霞
煮石山山去那用青銅挂杖邊

春日雨後閑居

夢回踈雨歇春色捲簾看雲放青山活天圍綠野寬柳濃
才護閣花重欲依欄性與閒相適添衣趁淺寒

曹扶谷云起句十字無限風神

大樹行

大哉此樹八人叉手不能圍枝如龍挈葉雲垂不知何年
生在小山西疑是循蜚之世羲軒時野火不能燒凡鳥不
敢棲但覺雷霆變現鬼神出沒連高枝春不榮冬不摧秦
松漢柏輪離竒半撐天上半垂地村童如猿往往接臂來
攀躋夜夜月明聲如潮翻萬馬嘶長夏炎炎人不知嗚呼
天生植物乃如斯世人但看桃李梨

清明野步

偶出步芳草村村烟火新亂山昏欲雨飛絮遠疑塵犬吠
藏花寺鴉窺掃墓人紙錢吹不住原上晚風頻

夏日閉居

榴花照眼日如年琢句差能省晝眠滿地綠陰無客過爭
巢鳥忽墮人前

獨坐

月出人籟息孤坐滅華燭雨晴山氣涼秋意侵巖屋橫琴
客不來泉聲隔幽竹

新晴埜步

新流亂石板橋通埜色無邊近却空滿地夕陽蒸小雨一
渠秋水照殘虹稻花香上隴頭路村樹綠低牛背童適見
遠山青缺處遲遲翻出兩三鴻

曹扶谷云委婉多姿

初秋漫興

老桂着花初涼生一雨餘蘚痕親獨坐山影抱閉居病起
新詩瘦貧來舊友疎眼前何所有天地此茅廬
曹扶谷云語有靜趣非粗心人所能領畧

日暮

日暮竹庭靜泉聲生野寒獨坐無機事素琴時一彈

夕陽

一抹微明雨乍收睡餘才見上簾鉤似聞牧子初吹笛每
值山人正倚樓林外恰隨殘葉墮水邊時帶野帆留莫教
容易成西下斷靄餘霞景亦幽

秋夜

雨停佳客去孤坐對梧桐斷雁疑驚月流螢欲避風病除
詩變格愁至酒無功寶鴨香銷盡新寒入座中

段純九過大樹堂彈琴醉後走筆贈之

孤村日暮山色佳無比鴻洲野人獨徙倚適有劍陽琴客
段純子訪我鴻洲野人五百里翩然一笑入門來苔蘚雲
霞滿衣履呼童掃榻頻開樽清談坐待燈花紫露冷宵深
羣籟止木樨香中調綠綺一彈秋天高再彈秋鴻起彈久
愈靜聲愈希絃似着指不着指才覺與君別幾時琴理琴
心進如此今古少有之知己可當牙期常不死爾彈悅我
我悅爾月白風清興難已

張竹軒云絕似任華贈李杜之作

秋草

莫上高樓望遠頻
吳頭楚尾最愁人
荒郊月黑啼秋雁
亂塚風寒散鬼燐
一火燒餘纔辨路
滿天吹起欲爲塵
心存不必悲憔悴
來歲春深綠又勻

曹扶谷云瘦硬

小步

小步本自佳
涼風散蒸煥
北雁正南來
田間香稻熟
林疎村忽明
路轉溪隨曲
雨霽白雲開
暮山起寒綠

秋暮送何芝巖

秋老榆城菊半殘
鴈行縹緲碧雲端
勸君痛飲休辭醉
黃

葉蕭蕭客路寒

見梅

將雪未雪天忽矮
似見前村梅破蘂
屢閉行心欲攀到
來還隔一溪水
只容相對不容親
忍寒作詩當寫真
今宵化蝶度溪去
定遇羅浮香裡人

村居

地僻稀逢好客來
柴門雖設不輕開
孤烟屋老琴橫榻
新月樓深酒滿杯
夢醒猶疑身是蝶
香銷尙覺火餘灰
夜寒莫訝臨風久
多恐中林鶴未回

滿賢林夜坐

夜久鐘魚定窺禪月在門葉聲消酒力潭氣肅詩魂佛座
騰驚鼠僧爐守凍猿妙香空際起趺坐悄無言

紀南池先生擒海賊事

南池先生滇儒英胸中有海兼有兵三年香山多善政鬼
夷亦解歌廉明是時海賊恣劫掠材官衛士俱消聲先生
聞之大震怒髮上指冠卽時去天雲變色蛟龍驚洋面風
帆不得住巨砲一發海水分官船直向賊船奔賊手失械
賊目瞪賊屍墮水賊血歎聳身跳入賊船裡擒出一賊怪

無比赤眸黑面黃髭鬚曰人非人鬼非鬼戲問爾賊願死
或願生賊猶欲縱怒相視翛然縛賊歸軍門官民爭識瘦
尹身區區數賊何足論書生方可敵萬人

曹扶谷云起結能見其大中間鋪叙處亦復勁利

山村偶步

偶出不逢人路轉一峯對颯颯松風吹飛泉濺衣袂炊烟
寒不収村間無犬吠數聲山笛來暝色上牛背

雨後出新舖

新折一枝山杏花醉辭酒店騎驢斜天公巧不施筆墨畫

出晴川塗暮鴉騎驢直入畫中去垂鞭妙索畫中句驢蹄
緩緩驢耳平夕陽流水數峯青

夜坐

漸覺煩喧息開窗夜氣幽亂山新雨歇深竹細泉流暑退
月彌白心清詩欲秋燈殘坐無寐衣上一螢投

喜雨

酒醒涼侵榻開簾濕漸勻好花如隔霧嬌燕欲依人細染
池塘草潛消綺陌塵春耕知已動綠野聽歌新

燕至

下上于飛兩翅舒年年社日訪吾廬頻催午夢言翻巧低
掠春波影去徐青草池塘微雨後晚風門巷棗花初芽簷
覓得安巢處作對銜泥意自如

客中

憶鄉難問信爲客易經春夜夜窓前月真堪作故人

睡起

地僻無人來一鳥啼高樹果落打琴絃琴鳴鳥啼住

遊古佛菴

古佛菴古山森圍山門開處支殘碑碑字半被風雨蝕知

江漢元景集
建古佛菴者誰古佛菴佛真古佛鍊盡佛形存佛骨有佛
無形佛更尊有佛無名菴自別菴前古樹雲氣攢樹下古
潭龍影蟠過客欲進不敢進偷眼乍驚毛髮寒我來狂吟
復酣酒得意非無亦非有一棒喝破婆羅門滿山怪石都
驚走

感通山夜坐

遙夜未成寐僧茶不厭多聽泉飛石壁看月上藤蘿洞響
疑龍戲山腥或虎過塵中勞擾客誰夢此岩阿

葉榆送友人

雨歇洱河濱孤城正夕曛人從花外別路向雪中分帆影
度山翠漁歌出水雲相思今夜月不敢借微醺

舟中卽事

濃陰漠漠晚涼生坐倚長天酒力平兩岸樓臺新雨歇一
洲村落淡烟橫浪前白塔疑常動帆外青山似亦行多謝
如盤東上月照人擊楫到昆明

晚過下關

地動長河急秋高落木空妖狐疑拜月鬼馬欲嘶風古塚
無人弔荒山有路通何來天半火吹墮白楊叢

曹扶谷云通首幽寂之况駭心動魄

響水關

飛瀑截猿呼松明落照餘石岩盤路細鐵索挂橋虛天壓
雲低帽峯回鴈掠輿到關尤未晚喜見月昇初

晚抵沙坪

雨霽天光接水光家家茅屋帶斜陽河邊市小無他物買
得公魚一尺長

抵葉榆

風緊城頭鼓角鳴大荒無際雁排翎西來日落河流赤北

望霜回地氣青駭目兩關龍虎怒防身一劍鷺鵠腥題詩
欲弔將軍墓恐惹英靈洒淚聽

夜行

月黑星全出人間路不迷墓田翁仲倒墟樹老鴟啼鬼冷
隨燐聚雲昏歷鴈低疎鐘空外響知到古城西

榆城晚眺

長河割地偏上下兩關懸暮景淒城角春容老杜鵑層巒
回返照亂塚入昏烟漸覺清明近思家倍黯然

春游時客葉榆

日暖天方午春濃雨乍收亂泉諸澗合殘雪數峯留柳色
侵漁市江光上酒樓妙香城不遠歌管韻悠悠

曹扶谷云似劉文房

過雞鳴村

溪風一徑野涼生溪竹千竿野翠橫日午家家香飯熟雞
鳴村畔聽雞鳴

照鏡見白鬚數莖感而賦此

昨日臨清流照見愁顏生今朝攬明鏡鬚沾霜幾莖回嗟
未三十風波會飽經險過此身在少年徒老成有鬚卽有

白乍白何須驚笑他世上人拔白如草輕人以白爲醜我
以白爲榮從此四海內拈之戲稱兄皚皚雖似雪耿耿詎
能平

鸚鵡關

雨歇未黃昏殘虹五色新亂山藏曲徑深樹恐行人翠養
岩成玉苔攢石長鱗不聞鸚鵡喚樵響隔雲頻

曉起卽目

芸窻猶未啟負手入園行一鳥發新籟四山開曉晴竹梢
殘雨重水面落花輕更愛池塘滿魚苗漸欲生

曹扶谷云琅然清圓

夾竹桃

着意成幽艷天然畫不如紅歸春暖後翠滴雨晴初在渡
漁應訪臨溪逸可居曉來香露重一樹擁堦除

上定西嶺

石路與天通衣翻日影紅羣山都在下一馬直盤空密樹
藏春雨輕嵐散午風建寧回首望城郭彩雲中

定西嶺登露井樓

地少天多處停驂眺此樓路盤高鳥背山立亂雲頭露井

無人識松泉洗耳流老僧笑亦雅詩解向予求

甸尾道中

雨歇天鋪畫殘陽處處皆鳥巢黃葉露僧寺白雲埋一水
明詩眼千峯亂酒懷新泥愁馬滑緩步度青崖

草舖不寐

頑僕睡先着客孤無所親葉驚時打戶螢倦欲依人聽雨
眉攢纈思家腹轉輪明朝如攬鏡應有髮成銀

露井樓卽事

泉飛石峭邊人立天低處秋寺晚鐘聲隨雲下山去

曹扶谷云天籟

遊中和峯

踏破雲千堵
芒鞋老欲磨
爛花堆失路
晴雪下添河
寺冷僧棲少
泉香鹿飲多
倦游才合眼
仙樂半天過

昆明留別武楚漁

酒盡當場奈別何
秋之爲氣發悲歌
霜催白草連天濶
日落黃雲出塞多
大海雄風曾共唱
蕭齋破硯久同磨
最憐今夜螳川上
坐倚殘燈數雁過

晚過西河觀

西出彌城郭
橋通一徑斜
市聲喧過水
人影亂如鴉
岸碧秋殘柳
天明雨霽霞
望窮飛去鳥
返照欲沉沙

遊白雲寺

一徑通幽處
苔隨屐跡生
飛樓懸雨氣
空谷甕泉聲
地僻僧多古
山青花更明
窺入林外鳥
時聽自呼名

曹扶谷云險絕

鼠死行

東死鼠西死鼠
人見死鼠如見虎
鼠死不幾日
人死如坼
堵盡死人莫問數
日色慘淡愁雲護
三人行未十步多
忽

死兩人橫截路夜死人不敢哭疫鬼吐氣燈搖綠須臾風
起燈忽無人鬼尸棺暗同屋烏啼不斷犬泣時聞人含鬼
色鬼奪人神白日逢人多是鬼黃昏遇鬼翻疑人人死滯
地人烟少人骨漸被風吹老田禾無人收官租向誰考我
欲騎天龍上天府呼天公乞天母洒天漿散天乳酥透九
原千丈土地下人人都活歸黃泉化作回春雨

屠笏巖先生云不作險語而鬼膽悉破奇詭在玉川長

吉之上然安知非識耶

張竹軒云是地下修文一腔熱血語

曹扶谷云事奇詩奇讀之覺不寒而慄

晚登五華樓望洱河

日落倚城樓殘霞綺未收蒼茫洱河水長抱兩關流岸樹
秋聲動漁村暝色浮蕭條何處笛吹起客中愁

雲津橋野望

江村過疎雨綠樹白雲藏橋影臥秋水荻花明夕陽遠山
四五點初雁兩三行獨睡不知晚衣間蒼翠涼

曹扶谷云漸近自然

六里箐

澗陡駭聞泉雲奔直到天電紅崖斷處松黑雨垂先接巒
林猿串潛身石虎拳翠淋欹磴滑人馬命相連

立秋

一葉忽驚墮蒼然天地秋病餘慙對鏡情遠怯登樓古樹
攢階響長江激枕流不知黔楚外兵甲可全休

秋夜

酒渴不成寐江聲生夜寒月依千籟靜霜逼一燈殘清極
眼無澁瘦來身更安聽餘天末雁仍取素琴彈

曹扶谷云起勢超拔

中秋對月懷家發源兄

碧天雲乍散縱目倚危欄一樣中秋月如何兩地看詩工
吟豈易酒好醉翻難不盡相思處吹燈坐漏殘

秋夜感成

深宵骨痛雨來先閉戶聞蟲最可憐老屋青燈棺並卧窮
途白髮淚雙懸時家大人以保舉人都前後丁愁多似
水慵謀飲夢亂如山怯就眠屈指明朝又重九心驚日月

箭離絃

不寐

愁多不成寐獨自結跏趺木落秋聲瘦山空夜氣孤月依
修竹下霜入小庭鋪虛白東方動時聞一鳥呼

曹扶谷云極空濶語却極幽秀

九日

兩年劍湖客病起遇重陽有酒容成醉無花更憶鄉涼風
生古木落葉下空堂不願登高望凭欄數雁行

鶴頂寺晚坐

鐘定妙香微懸窓坐息機海霞明雁路松日淡僧衣暝色
諸天落秋聲萬壑歸無邊風露裡片片濕螢飛

曹扶谷云似齊梁間人語

垂釣

也向烟村外垂綸坐石磯柳花輕拂袖江色淡生衣心對
青山靜時看白鳥飛一竿輕得失月出澹忘歸

夜坐

老桂立清霜關門坐月涼一庭如野濶雙鶴並人長性淡
愁難着神全睡易忘靜看墻角蘚隱隱發秋光

雨後池上偶得

雨歇園林潤池塘漲綠波燕泥沾絮濕魚沫聚花多曝粉

憐孤蝶浮錢愛小荷遙山青斷處一帶白雲拖

山居偶得

自得山居樂餐霞世事忘石巖開作戶茅草結爲堂家富
書千卷田豐硯一方酣歌人莫笑天縱此生狂

鴻洲天愚集終

鴻洲天愚集題詞

辛酉春我友荔屏需次于京以其亡嗣立夫剩稿示余才
思挺削非青蓮之仙亦異昌谷之鬼惜其騎鯨賦樓視兩
賢尤速也他日荔屏詩集梓行于世而茲稿得附若翁以
傳所謂張吾軍者不其然乎 蓉江屠紳書于京寓

此君冰雪姿天機絕清妙家學擅風騷英年振奇調韻逸
緜山笙清澈蘇門嘯尋幽必奇險不踐人所到始讀點蒼
篇穆然見深造東野南山句對此失排募吐屬輞川幽研
精杜陵與長句復嶽嶽健筆聳孤峭怒猊鬣長馳生氣懾

鴻洲子集
貌豹近體務生新冥搜出窾窾設令縱所詣詞壇驚蹠蹠
詭僻莫敢矜綺靡迹如埽練心寄水絃移情水仙操琴理
與琴心淵然探秘要銜杯吟松風江山恣憑眺薄醉清興
來苔磯或垂釣恨無元真子水天放孤掉富貴如浮雲世
事總譎好有會卽賦詩同志供笑傲所留無十一良足深
嗟悼徐庾名父子趨庭有殊教夫子大手筆莫能競高蹈
和陰無繁音已足息羣噪滄波一滴同吉光片羽耀比如
六銖香世界不足較今也人琴亡哀哉天不弔
嘉慶壬戌暮春竹軒弟張葆光拜題于小停雲館

傳家詩律本陰何一逕通幽別揣摩眼底西風心上雨由
來各士得秋多

海外何須問九州胷中邱壑費冥搜風雲已絕天無路心
死焦原未要愁

荷絲不斷妙蓮因自是天生色界人辛苦一吟雙淚落猜
他賈島佛前身

大荒披髮竟何之一片秋山月落時鬢髻松陰聞鬼唱可
憐猶是鮑家詩

桐鄉曹三選扶谷氏拜題

夜來風雪震林麓青燈閃閃如豆綠僧廬寂坐孤無眠貫
耳江濤撼城腹如決三峽湮劍門如驅太華塞河瀆瑤階
玉樹遭愍凶碧梧翠竹同摧衄案上陰森翻卷軸手提一
卷天愚讀風聲不歇吟聲續風聲吟聲滿僧屋讀罷呵毫
書卷曠青年長逝天不祿清姿挺拔詩敏捷長篇大篇紛
滿日輞川少陵懃把握流水高山寓幽獨風清月白今陵
谷離奇卷上奔龍蛇仙才豈許留人家雲旗風旆游五華
蕩山龍女扶龍車長天耿耿飄冰花安得此夕共追逐同
賦異狀爭紛拏挑燈起作招魂篇君欲來兮阻天涯千里

萬里空谷嗟

甲子上元後三日夜大風雪閉戶兀坐因檢此集悚讀
一過題之卷尾以致惋惜古皖頑伯弟鄧石如拜草

溪山鬱蒼蒼
溟海浩瀾瀾
山情與海情
剛柔非異旨
靈秀鍾其間
挺作天恩子
神淡九秋菊
志潔三湘芷
餅不啖紅綾
音惟寄綠綺
花前酒百壺
披襟澆塊壘
或放阮眼青
或墮唐淚紫
搖筆數千言
牟尼光走紙
健懾李杜魂
奧吸蘇韓髓
奇響徹霜鐘
魍魅遠遯徙
少博乃祖歡
甘分栗與李
長從若翁遊
冷署究經史
若翁上長安
乃祖親杖履
有祖持門戶
代翁供菽水
嬰鑠邁文淵
貽書慰居止
倏驚旌節迎
哀號顙流泚
含歛必盡慎
孑身慘經紀
呱呱產靈雛
弱穉齒未毀
疵癘叠構凶
配殉阿姑死
衰

經臥秋風藉杖而後起體羸心獨壯長劍天外倚髮白鏡
中絲鬼摘燈前藥人鬼時雜居僵尸枕墟里眞宰訴難聞
殘骨掩荆杞哀哉廿八齡大夢歸太始熒熒兩遺孤喪殮
寄諸姊千里聞凶耗乃翁痛雙趾蹣跚阻歸計血淚漬
牀第歲月嘆易馳速似弧發矢翁出宰雷池魂夢繫桑
梓剩稿篋中藏公餘校亥豕鐵禪錄本工竹軒賞未已蔚
彼雄秀姿誰歎敢逼視古艷照鬢眉生香濺脣齒宇內起
騷壇乃翁執牛耳著作邁百家聲清中宮徵君才亦
獨造心似穿珠蠃洵足張吾軍差與阿買比漁笛竹比編

箐園堯峰理今輯鴻洲篇父子稱濟美風雅有淵源轉悲
以爲喜行將徧天下名並山海峙

嘉慶甲子穀雨前三日世愚弟魯敷杏雨氏拜題

鴻洲天愚集者

荔扉先生令嗣立夫之遺詩也

公與家儲甌叔同舉甲

午孝廉家叔宰震澤而公亦以學正膺卓薦奉

天子命作令望江又同爲制軍屬昔侍

宦于津門也則與先舅氏王蔚如先生稱莫逆交今來治

于雷陽也則召元弼司記室事夫以數世之好相距萬里

而一旦聚焉其愉快爲何如公以詩紀年著作獨富元

弼受讀之下旣已校其魯亥而敬識之越日復以立夫遺

詩見眎清微峭削極得唐人三昧以是益見趨庭之訓而

歎其才爲不可及也乃天旣生人以才而又阨之于才此
其中若有大不幸焉於立夫是已嗚呼片羽零箋今旣得
附梓於公集之末是亦不幸中之幸吾知後之覽者誦
其詩想見其人而健羨其才又不禁重歎夫天之不加以
年也惜哉

嘉慶壬戌立秋前一日皖桐世愚弟鐵禪張元弨拜跋